

Ekwo Sámelù k'èbo

Anwùhu Sọlu erwu Dévidi lẹ nchị

1 ¹Tòbudu iya bụ; Sọlu nwùhuchaepfo; Dévidi shi l'ògu ono, o gbushiru ndu Amalẹku ono lwa; bya anọo abali labọ lẹ mkpukpu Zikulagu. ²O -rwua mbọku ophu kwe iya ẹto; a bya ele ẹnya; nwoke lanu, shi waa l'odu-ogu Sọlu pẹ rwua; yee uwe iya, a gbajashichaaru agbajashi; kporu urwuku kpua onwiya l'ishi. O byapfutaepfo Dévidi; bya adaa kpurumu l'alị gude kwabẹ iya ùbvù. ³Dévidi jịa ya sụ iya: “?Bụ aweya bẹ i shi?”

O sụ Dévidi: “Mu shikwa l'odu-ogu ndu Ízurelu gbalaa.”

⁴Dévidi sụ iya: “?Denu g'ọ nwuru? Jiko kọeshiduru mu iya.”

O sụ Dévidi: “Ndu Ízurelu gbakashihukwaru l'iphu ogu ono. Ndu ophu dọ igwerigwe bẹ daru nwùshihu; k'ophu bụ lẹ Sọlu yee nwa iya, bụ Jionatanu bẹ tukurorù nwùshihukota.”

⁵Tòbudu iya bụ; Dévidi bya ajịa nwokorọbya ono, byaru bya akọoru iya iphe ono sụ iya: “?Denu g'i shi maru lẹ Sọlu yele nwa iya, bụ Jionatanu bẹ tukurorù nwùhuchaa?”

⁶Nwokorọbya ono, byaru akọoru Dévidi iphe ono sụ: “O nweerupho g'ọ meru; mu nọdu l'úbvú Gilubowa; Sọlu l'onwiya nọdu l'ẹka ono nmakpuru l'eli arwa iya. Ugbon-inya ndu ohogu iya; yele ndu agba l'inya ono nọdu achịwa iya kpabẹ kpabẹ. ⁷No iya; Sọlu bya aghaa ẹnya l'azụ hụma mu; bya araku mu. Mu jịa ya sụ: ‘?Bụ gẹ mu mee gunu?’ ⁸O jịa mu: ‘?Bụ onye bẹ i bụ?’ Mu sụ iya lẹ mu bụ onye Amalẹku. ⁹O sụ mu jiko gẹ mu bya apfụ-kube iya gbua ya; noo kele ya nọ ndzụ, onwu ka mma! ¹⁰Mu jenu apfụ-kube iya; woru iya gbua; noo kele o doru mu ẹnya l'ọ -darwuwa alị bẹ ọ bụwaa iya onwu. Mu bya ekputa iya okpu-eze, o kpu l'ishi; bya agbata iya echi, ọ gba l'ẹka; ọ bụru iya bẹ mu gude wotaru gube nnajipuhu mu l'ẹka-a.”

¹¹Noo ya; Dévidi yẹle ndu ẹphe l'iya swi ye ẹka l'uwe pẹ gbajashichaa.
¹²Ẹphe tuko raa ẹkwa; ға aphu; swia ẹgu jeye l'uzenyashi l'opfu ẹhu Sọlu; me nwa iya nwoke, bu Jionatanu; me ke ndu ojoḡu Chipfu, bu onu-ulo Ízurelu ono, e gude ogu-echi gbushia ono.

¹³Dévidi bya ajia nwokorobyanya ono, byaru iya edoru iphe ono su iya: “?I bu onye awe?”

O su: “Mu bukwa nwatibe onye Amaleku, bu mbyambya.”

¹⁴Dévidi jia ya su: “?Bu gunu be i ti tsuduru ebvu k'ahali ẹka gbua onye Chipfu wuru manu l'ishi?” ¹⁵Dévidi bya ekua onye lanu l'unwoko-robya iya su: “Je egbuta nwoke ono tua!” O je egbuta iya tua; o nwuhu.
¹⁶Dévidi su iya: “Gochi ngu tukokwaru ngu l'ishi; noo kele i gudewaa onu ngu gbaa onwongu ama su l'oo ngu gburu onye Chipfu wuru manu l'ishi.”

Dévidi agụ aphụ Sọlu yẹle Jionatanu

¹⁷Toḡudu iya bu; Dévidi bya agua ebvu-aphu ẹhu Sọlu yee nwa iya, bu Jionatanu; ¹⁸bya asu g'e zia ndu Jiuda g'aaguje ebvu-aphu ono. Epha ebvu ono bu “apfu.” Eka e deru ebvu obu bu l'ekwo Jiasha.

¹⁹“Úbvù, i du gube Ízurelu be
 e gbuwaru toḡbo l'eli úbvù!

Gẹ ndu okpehu du
 tuko dabyigbaaru!

²⁰G'e te pfukwa iya le
 mkpukpu Gatu;
 ophu a rakwa iya arara tsoru
 gbororo oma mkpukpu
 Ashikelonu; a -nonyaa;
 ẹhu je atsoahaa unwada
 Filisitayinu utso;
 mbu a -nonyaa;
 unwada ndu ono,
 e buduru úbvù ono
 tūahaa okoo.

²¹Unube úbvù úbvù Gilubowa;
 g'iji ta akwabaekwa kpua unu;
 ophu mini edzebaekwaru unu;
 ophu unu enweekwaru ali,
 emehuje iphe.

Noo kele oo l'eli unu be a no
 merwua iphe, ndu okpehu du
 egudeje egbobuta
 onwophe l'ogu.

- Mbù l'iphe, Sòlu egudeje
egbobuta onwiya l'ògu
bẹ a taa nyìbaedu manù.
- 22 Apfù Jionatanu bẹ ta
akpòlajeduru azù g'ò tò
nmòpfuta ẹba ndu òkpehu dù;
òphu ogu-echi Sòlu
ta alwajèduru l'ẹbe abù
l'o gburu nemadzù jasùru
o ji iya.
- 23 Sòlu waa Jionatanu;
teke unu nọ ndzù bẹ unu
shi ama ntumatu;
tẹme unu bọru ndu
e yeru obu.
Òphu unu ekekahaduru
ekekahaa jasù l'ònwu.
Unu shi ka ugo eme barabara;
tẹme unu shikwaphọ ka
oduma òkpehu.
- 24 Unubẹ unwada Ízurelù;
unu kwaa ẹkwa Sòlu;
mbù onye ono,
yeru unu uwe uswe-uswe,
ama mma ono;
onye ono, gude
mkpọla-ododo
memashịa uwe,
unu yeru l'ẹhu ememashị ono.
- 25 Lewarọ gẹ ndu òkpehu dù
dabyigbaaru l'ẹka ẹphe
larù l'ògu!
L'eli úbvú bẹ e gburu
Jionatanu tògbo.
- 26 Mu agù aphù ẹhu ngu;
nwune mu Jionatanu.
I shi bụnukaru mu onye vu
oke aswa.
N-yemobu, i shi yee mu bẹ
dùkwa biribiri.
Ọ ka n-yemobu k'unwanyi
adù biribiri.

27 Lewarọ gẹ ndu ọkpehu
dabyigbaaru!
Ngwọgu, eegudeje alwọ ọgu
búkotawa ọla-l'iswi!”

Eechi Dévidi eze ndu Jiuda

2 ¹Tọbodu iya bụ; e mecha; Dévidi je akpata Chipfu ishi; sù: “?Bù gẹ mu tųgbua lashiá mkpųkpų lanų lẹ Jiuda?”

Chipfu sù iya: “Ngwanų!”

Dévidi jia ya sù: “?Bù aweya bẹ mu a-la?”

Chipfu sù iya: “Lashinaa Hẹburonu!” ²Ọo ya bụ; Dévidi lashiá ẹka ono; yẹle unyomu iya ẹphenebo; mbụ Ahinowamu kẹ Jiezerẹlụ; waa Abigelu kẹ Kamẹlụ, bụ nwanýi ono, ji ya, bụ Nebalụ anọedu ono. ³Dévidi bya achítakwapho unwoke yẹe ya swi; onyenọnu duta ndibe iya; ẹphe je eburu lẹ mkpųkpų Hẹburonu waa mkpųkpų lẹ mkpųkpų, nọgbaa ya nụ. ⁴Ọo ya bụ; ndu Jiuda byatashiá Hẹburonu. Ọ buru l'ẹka ono bẹ ẹphe nọ wụa Dévidi manų l'ishi g'ọ buru eze ndu ọnu-ọlọ Jiuda.

A bya epfuaru Dévidi l'ọo ndu Jiabẹshi-Giladu bẹ liru Sọlụ. ⁵Dévidi bya ezia ndu oozije ozi g'ẹphe je ezia unwoke mkpųkpų Jiabẹshi-Giladu sù phe: “Gẹ Chipfu goru ọnu-ọma nụ unu k'ùbvù ono, unu kwabẹru Sọlụ, bụ nnajjuphu unu; woru iya lia ono. ⁶Gẹ Chipfu goshikwa unu n-yemobu ọmaa ya; goshikwaphọ unu lẹ ya gbaru g'e gude ire iya ẹka l'opfu ẹhu unu! Mbẹdua, bụ Dévidi l'onwomu e-mekwarupho unu iphe-ọma eshi ọphu unu meru ẹgube iphe-a. ⁷Ọo ya bụ; g'ẹka shihukwa unu ike; unu aburu ndu ike dų; noo kẹle nnajjuphu unu, bụ Sọlụ bẹ nwụhuwaru nų; ndu ọnu-ọlọ Jiuda wụwa mu manų l'ishi gẹ mu buru eze phe.”

Eechi Ishibosheti eze ndu Ízurelụ

⁸Ábuna nwa Nẹru, bụ onye-ishi ndu ojogu Sọlụ bya edufuta nwatibe Sọlụ, bụ Ishibosheti duru bya lẹ mkpųkpų Mahanayimu. ⁹Ọ bya emee ya eze ndu Giladu; mẹ ndu Ashuru; mẹ ndu Jiezerẹlụ; mẹcha ndu Ifuremu; mẹ ndu Benjiaminu; mẹwaro ndu Ízurelụ l'ophu. ¹⁰Nwatibe Sọlụ ono, bụ Ishibosheti bẹ nọwaru ụkporo apha labọ teke e meru iya eze ndu Ízurelụ. Iphe, ọ nọru l'aba-eze ono bụ apha labọ.

Ọle ndu ọnu-ọlọ Jiuda bụ Dévidi bẹ ẹphebedua awụ etso. ¹¹Dévidi buru lẹ mkpųkpų Hẹburonu buru eze ndu ọnu-ọlọ Jiuda. Iphe, ọ nọru l'aba-eze bụ apha ẹsaa l'onwa ishii.

Ọgu adaru ndu kẹ Dévidi; ẹphe lẹ ndu kẹ Ishibosheti

¹²No iya; Ábuna nwa Nẹru yẹle ndu ejeru Ishibosheti, bụ nwa Sọlụ ozi shi lẹ Mahanayimu tųgbua jeshia mkpųkpų Gibiyọnu. ¹³Jiowabu; nwa Zeruya yẹle ndu ejeru Dévidi ozi tųgbua jepfushia phe l'okpuru, nọ lẹ

Gibiyonu. Ndu ophuu dọru l'azọ okpuru ono ibe lanu; ndu ophuu dọru l'ibiya ophuu. ¹⁴Ábuna bya asu Jiowabu: “G'unwokoroby-a haeduru gbalihu l'iphu anyi je g'ephe le nwibe phe lwupfuru.”

Jiowabu su: “Ngwanu; g'ephe gbalihunu je.”

¹⁵Oo ya bu; ephe bya awu-lihu; a bya aguta phe umadzu iri l'ebo l'eka iya ke ndu Benjiaminu yele Ishibosheti, bu nwa Solu; bya guta umadzu iri l'ebo l'eka iya ke Dévidi. ¹⁶Oo ya bu; onyenonu bya awocharu nwibe iya l'ishi; woru ogu-echi nmachaa ibe phe le mgbureku; ephe tuko daa nwushihu l'ugbo lanu. Noo iphe, meru g'o gude e kuahaa eka ono “Egu Ogu-echi”. Eka ono be no le mkpukpu Gibiyonu.

¹⁷Ogu mboku ono kpohu oku. Ndu ke Dévidi lwu-kpee Ábuna yele unwoke Ízurelu. ¹⁸No iya; unwegirima unwoke Zeruya ephe n'eto nodu-kota l'eka ono; mbu Jiowabu; me Abishayi; yele Asahelu. Asahelu be bu onye emebe barabara ge mgbada. ¹⁹Asahelu chipyabe Ábuna kparakpara; l'ebe ele enya l'ekutara; ozo ekicha; ke ge ya dakobe; haa ya achí oso. ²⁰Ábuna bya aghaa enya huma iya. O jia ya su: “Asahelu; bu gubedua?”

O su iya: “Oo mbedua be o bu.”

²¹Oo ya bu; Ábuna bya asu iya: “Laphu azu. Shia ekutara ngu; ozoo eki-cha; gude onye lanu l'unwokoroby-a ono; nashichaa ya ngwoğu iya!” Ophu Asahelu te ekwedu haa ya achí oso. ²²Ábuna bya anmaaru Asahelu okwa ozo; su iya: “Laphu azu; ba achíhe mu! Mu -gbutsukpoo ngu nta-a; ?mu eshi ishiagha palia iphu l'eka nwune ngu, bu Jiowabu no?” ²³Ophu Asahelu ekwedu le ya a-ha iya achí oso. Oo ya bu; Ábuna bya eworu onuonu arwa iya sa Asahelu l'epho; o foo ya lokpurukpu. O daa nwuhu l'eka ono. O nodu abujeru; onye jetaru bya ebu ishi l'eka ono, Asahelu dabyiru ono; loopfuru.

²⁴Jiowabu yele Abishayi chipyabe Ábuna. O buru g'enyanyu aribawa be ephe chirwuru iya l'ubvu Ama, no chebe iphu le mkpukpu Giya l'uzo ibiya ophu eeshije eje l'echiegu mkpukpu Gibiyonu. ²⁵Unwoke Benjiaminu dzukobe tuko pfuru Ábuna l'azu. Ephe tugba onwophe nanu; buru ogbogu lanu; je atuko pfuru l'eli ubvu lanu. ²⁶Ábuna bya ekua Jiowabu su iya: “Buwaro ya mma be anyi e-gude egbushi onwanyi jasuru? ?Ti madu l'ikpetemazu be iphe-a e-mechaa buru anyi apfu? ?Bu teke ole bu a -no-beadaru teme l'i pfuaru ndu nkengu g'ephe haa achí unwunna phe?”

²⁷Jiowabu yee onu su: “Eshinu Chileke no ndzu g'o no iya-a; be o to bu l'i pfuru opfu; me ndu-a anoduekwapho achí unwunna phe-a g'ephe achí phe jasú l'utsu.” ²⁸Oo ya bu; Jiowabu bya eworu opu gbua; ndu ojogu ono paru achí ndu Ízurelu oso haa; ophu ephe alwubaeduru ogu ozo.

²⁹Ábuna yele unwoke, ephe l'iya swi; shia nsuda Araba jekota ije lenyashi mboku onoya. Ephe daa enyimu Jiordanu. Ephe jekota ije l'utsu iya futa le mkpukpu Mahanayimu.

³⁰Oo ya bu Jiowabu bya eshi le k'achí Ábuna ono lwa; bya akpakoo ndu nkiya. Umadzu iri le tete buru ndu acho achocho le ndu ke Dévidi; a

-gufukwa Asahèlu. ³¹Òlè ndu kẹ Dévidi ono gbukwanwuru ụkporo ụmadzu iri l'eshato, bụ ndu ipfu Benjiaminu mę ndu ephe lẹ Ábuna aswije. ³²Ephe pata Asahèlu je elia l'ilu nna iya lẹ Bẹtulehemu. Ọo ya bụ; Jiowabu yẹle ndu nkiya tughua l'enyashi ono; ọ buru lẹ nchi-abọhu bẹ ephe jerwuru Hẹburonu.

3 ¹Onu-ulo kẹ Sọlu waa kẹ Dévidi bẹ ọgu, daru phẹ nụ bẹ ephe lwụkporu nọo ọdu. Ọkpehu kẹ Dévidi nọdu aka shii eje; ike ka abvu onu-ulo kẹ Sọlu abwubvu eje.

Ụnwegirima, a nwụshiru Dévidi lẹ Hẹburonu (Iiphe 3:1-4)

²A nwụshiru Dévidi unwoke teke o bu lẹ Hẹburonu. Ọkpara iya bụ Amunonu. Onye nwuru iya nụ bụ Ahinowamu kẹ Jiezerelu. ³Nwa iya k'ẹbo bụ Kilabu. Onye nwuru iya nụ bụ Abigelu, bụ onye shi buru nyee Nebalu kẹ Kamelu. Nwa iya k'eto bụ Abusalomu. Onye nwuru iya nụ bụ Maka nwada Talumayi, bụ eze ndu Geshu. ⁴Nwa iya k'eno bụ Adonijia. Onye nwuru iya nụ bụ Hagitu. Nwa iya k'ise buru Shefataya. Onye nwuru iya nụ bụ Abitalu. ⁵Nwa iya k'ishii buru Ituramu. Onye nwuru iya nụ bụ nyee ya, bụ Egula. Ndu-a bẹ a nwụshikotaru Dévidi teke o bu lẹ Hẹburonu.

Ábuna etsoru Dévidi

⁶No iya; ọ buru teke ono, ọgu adaru ndu onu-ulo Sọlu waa ndu onu-ulo Dévidi ono bẹ Ábuna nọ l'eka ulo kẹ Sọlu; alwushi ọgu ike. ⁷Sọlu bẹ nweru nwanyi, o to shidu alu ọkpobe alulu. Epha iya bụ Rizupa, nwada Aya. O be ujiku lanu; Ishibosheti bya ekua Ábuna su iya: “?Denu iphe, meru g'o gude unu lẹ nwanyi, nna mu ta ludu ọkpobe alulu nodu akwaje?” ⁸Tobudu iya bụ; ẹhu ghushiahaa Ábuna egbu ike lẹ k'opfu ono, Ishibosheti pfuru ono. Ọ su Ishibosheti: “?Iiri lẹ mu bụ oke nkuta ndu Jiuda; k'opfu mu e-shi eshi teke ono bya eye ntanu-a; gude obu mu g'o ha turu ikè yeru nna ngu Sọlu; mę ndibe iya; mę ndu yee ya eshi onya. Mu nodu alwukpoeppo ọgu ẹhu unu gę ndu kẹ Dévidi ta alwuta unu; i gbę nta-a bya ekobe mu opfu ẹhu nwanyi-a. ⁹Gę Chileke gwakwa mu ọchi; mbu g'o mekwa mu ọphu ka njo m'o buru lẹ mu te emeduru Dévidi iphe ono, Chipfu riburu lẹ nte; kwee ya ukwe iya ono; ¹⁰mbu lẹ mu a-nafu onu-ulo Sọlu aba-eze ono; woru Dévidi mee g'o buru eze ndu Izurelu mę Jiuda; e -shi lẹ Danu jasụ lẹ Biye-Sheba.” ¹¹Ọphu Ishibosheti ahalibaeduru onu k'epfu opfu yeru Ábuna ọzo; kele ọotsu iya ebvu.

¹²Ọo ya bụ; Ábuna bya ezia ndu oozije ozi g'ephe jeru iya ibe Dévidi lẹ Hẹburonu je asu iya: “?Bunaa onye bẹ alu-a du l'eka? Gę mu lẹ ngu gba-naa ndzu; gę mu eyeta eka mee gę ndu Izurelu l'ophu lwakota ngu l'eka.”

¹³Noo ya; Dévidi su: “?Du ree! Mu lẹ ngu a-gba ndzu obu. Ọlè mu elekwanu enya iphe lanu l'eka ngu, bụ iya bụ gi ti shitakwa eka mu nọ

gbahaa l'i du Mikalu, bụ nwada Sọlu dutaru mu m'ì byajeepho gẹ mu lẹ ngu hụma!" ¹⁴ Dévidi bya eye ndu-ozì g'èphe jefpu Ishibosheti, bụ nwa Sọlu je asụ iya: "Dee mu nyee mu Mikalu, bụ onye ono mu butaru akpapyi ndu Filisitayinu ụkporo ise gude kwaa aswa iya ono." ¹⁵ Oo ya bụ; Ishibosheti zia; e je anata Mikalu l'èka jì iya, bụ Palutelu nwa Layishi. ¹⁶ Jì nwanyì ono nọdu ara èkwa etso iya l'azụ jeye èphe jerwua mkpụkpu Bahurimu. Ábuna sụ iya: "Tụgbule-a lashia ibe ngu!" O laphushia azụ.

¹⁷ Ábuna bya ekua ndu bụ ogerenya ndu Ízurelu l'ìdzù sụ phẹ: "Unu shiwaa teke dụ ẹnya seta g'unu e-shi mee Dévidi eze unu. ¹⁸ Ngwa; unu mee ya ya nta! Noo kẹle Chipfu kwewaru Dévidi ukwe sụ: 'Oo l'èka nwozi mu, bụ Dévidi bẹ mu e-shi nafuta ndibe mu, bụ ndu Ízurelu l'èka ndu Filisitayinu; mẹ l'èka ndu ohogu phẹ l'ophu.'" ¹⁹ Ábuna l'onwiya bya epfukwarupho yeru ndu Benjiaminu. O bya atụgbua jeshia Hẹburonu je edooru Dévidi iphemiphe, ndu Ízurelu; mẹ ndu ipfu Benjiaminu l'ophu abya ememe.

²⁰ O beepho teke Ábuna yẹle unwoke ụkporo, yẹe ya swì jeru ibe Dévidi lẹ mkpụkpu Hẹburonu; Dévidi shiaru iya nri; yẹe ndu yẹe ya swì. ²¹ Ábuna bya asụ Dévidi: "Gẹ mu bya eje nta-a je ekukooru gube eze, bụ nnajìuphu mu ndu Ízurelu l'ophu gẹ gụ l'èphe gbaa ndzụ; k'ophu ìi-bukotaru eze ndu ono, oogu obu ngu egu g'ì buru ono." Oo ya bụ; Dévidi dukwa Ábuna; o tųgbua lashia l'èhu-guu.

Jiowabu egbu Ábuna

²² O bukpoerupho teke ono bẹ ndu-ozì Dévidi waa Jiowabu shi ogu ndu o-lwua-olaa, èphe jeru bata; vuru iphe, parụ èka èphe kwataru l'okwata lwa. Olee Ábuna ta anọekwanu l'ibe Dévidi lẹ Hẹburonu; kẹle Dévidi dukwawaru iya; o tųgbua lashia l'èhu-guu. ²³ Jiowabu yẹle ndu ojogu, yẹe ya swì bataèpho; e pfuaru iya lẹ Ábuna nwa Nẹru bẹ shikwa byapfuta eze; o dukwawa iya o lashia l'èhu-guu. ²⁴ Oo ya bụ; Jiowabu jefpushia eze je asụ iya: "Bụ gunu bẹ i meru egube ono? Bụ gunu meru g'o gude Ábuna byapfuta ngu; ì haa ya; o lashia? Nta-a bẹ o lashighawaru! ²⁵ Mbụ-a; ì maru-a onye Ábuna nwa Nẹru bụ. O kwa ụgho bẹ o byaru ngu aghoru; bya g'o makotacharu g'ijje iya ala; gẹ ya makotaru iphemiphe, iimekpoo ememe."

²⁶ Jiowabu bya atụgbua lufu l'iphu Dévidi. O bya ezia ndu-ozì iya g'èphe gbapfu Ábuna. Èphe gbapfu Ábuna lẹ wẹlu Sira kuphuta iya azụ; ophu Dévidi ta amadu. ²⁷ Ábuna lwaphutaèpho azụ lẹ Hẹburonu; Jiowabu kuchi iya ekuchi l'onu-oguzo g'o bụ l'o nweru iphe, oome g'o pfuaru iya lẹ mpya. O buru l'èka ono bẹ Jiowabu nọ nmafua ya èpho; o nwụhu. O shi nno gwata ụgwọ ochi nwune iya pho bụ Asahelu. ²⁸ E mechaa; Dévidi bya anuma iya. O sụ: "Mu lẹ ndu alì-eze mu bẹ ikpe ta anmakwaru l'iphu Chipfu jasuru asuru lẹ k'egbugbu, e gburu Ábuna nwa Nẹru. ²⁹ G'o bukwaru Jiowabu; mẹ onu-ulo nna iya l'ophu bẹ ochi Ábuna a-tụ-koru

l'ishi! G'onye vu atashì ta abvùkwa abvùbvù l'ònlù Jìowabu; ọzoo onye ekpenta eme; ọzoo onye gude mgboro ete okpa; mē onye e gburu l'ike; mē onye akpa nri.”³⁰ Ọ buru Jìowabu yele nwune iya nwoke, bụ Abishayi bē gburu Ábuna kele ọo ya gburu Asahelu, bụ nwune phē l'ogu lē mkpukpu Gibiyonu.

Eeli Ábuna

³¹Dévidi bya asù Jìowabu mē ndu ephe l'iya nọ: “Unu gbajashia uwe unu; unu achita uwe-aphu yee; tuko raa ekwa Ábuna.” Eze, bụ Dévidi nọdu etso igbe-odzu ono l'azu. ³²Ephe lia Ábuna lē Hēburonu; eze kwaa idemini l'ilu Ábuna. Ndu nọkota l'eka ono rakota ekwa. ³³Eze, bụ Dévidi bya agua ebvu-aphu ehu Ábuna sù:

“?Ọ gbaru g'ọ buru Ábuna bē a-nwuhu anwuhu onye-eswe-a?

³⁴E te keduru ngu egbu l'eka; ophu a tuduru ngu mkporo l'okpa.

Ị laru l'ike g'onye dabaru ndu ejo-iphe l'eka.”

Ndu nọkota l'eka ono tuko tu uzu-ekwa iya ozo.

³⁵Ndu ono g'ephe ha bya atuko rwoahaa Dévidi g'o ria nri lē teke ọ bukwadu l'eswe. Obenu lē Dévidi riburu nte sù: “Gē Chileke gwakwa mu ochi; mbu g'o mekwa mu ophu ka njo mē mu wotawaa nri dee l'onu; ọzoo wota iphe ozo, ria teme enyanwu ariba!” ³⁶Ndu ono l'ophu tibe iphe ono nvo; teme ọ tsoo phē utso; mbu-a; iphemiphe, eze Dévidi meru dukota phē ree. ³⁷Ọo ya bu; ndu ono g'ephe ha; je akpaa lē ndu Ízurelu l'ophu tuko maru leze, bụ Dévidi bē eka iya ta adudu l'egbugbu ono, e gburu Ábuna nwa Neru. ³⁸E mecha; eze je asù ndu-ozì iya: “?Unu ta amadu l'onye-ishi; mbu oke amadu bē nwuhuru nu l'alì Ízurelu ntanu-a? ³⁹Ọ bụ eviya l'a wuru mu manu l'ishi gē mu buru eze; obenu l'ike ta adudu mu ntanu-a; noo kele unwegirima Zeruya bē nabaru mu eka. Gē Chipfu pfukwa ndu eme eji ugwo g'ejo-ememe, ephe meru habe!”

Eegbu Ishibosheti

4 ¹Tobudu iya bu; Ishibosheti; nwa Solu numaephe lē Ábuna bē nwuhwaru nu lē Hēburonu; ike bvù iya; ndzu guhu ndu Ízurelu l'ophu. ²Nwa Solu ono bē nweru unwoke labo, bụ ndu-ishi ọ-lwua-olaa. Epha onye lanu bụ Bana; epha onye ophuu buru Rekabu. Ephe tukuru buru unwu Rimonu, bụ onye ipfu Benjaminu bya aburu onye mkpukpu Berotu. Berotu ono bē a gukoberu l'ekiya kē Benjaminu; ³kele ndu Berotu gbaru oso laa mkpukpu Gitayimu je ebuwaruro l'eka ono buru ndu lwaru alwalwa byasu ntanu-a.

⁴No iya; Jionatanu, bụ nwa Solu bē nweru nwa iya nwoke, iphe lo-nwuru okpa labo. Ọ buru teke nwata ono nowaru apha ise bē e shi lē Jiezeru bya edoo k'anwuhu Solu yele Jionatanu. Nwanyi, ehe nwata ono numaephe iphe ono; o kwo gburumu jeshia gē ya kuta nwata ono

gbalaa; nwata nyífu iya daa; mechaa búru eniyeni. Èpha nwata ono bu Mefibosheti.

⁵Noo ya; Rekabu waa Bana, bú ̀unwu Rìmonu, bú onye Berotu ono bya atugbua mbòku ono; ọ búru phẹ eje ibe Ishibosheti. Ọ búru l'echilabọ eswe bẹ ephẹ jerwuru ibe Ishibosheti lẹ teke ọ nọ atùta unme eswe. ⁶Èphẹ bya abahù l'ime ̀lo iya g'ò bú l'èphẹ eje ahata witi. Èphẹ nmafua ya èpho l'ime ẹka ono; bya epyofu; gbalaa. ⁷Ọ búru teke Ishibosheti zẹ azẹ l'iphe-azẹe ya bẹ ephẹ bapfuru iya l'ime mkpuru l'ẹka ọozeje l'ime ̀lo iya. Èphẹ nmaa ya mma; nmagbua ya; bya egbuta iya ishi. Èphẹ pata ishi iya ono tũgbua jekọta ije l'uzo nsũda Araba l'enyashi mbòku ono l'ophu. ⁸Èphẹ pata ishi iya ono pataru Dévidi lẹ Hẹburonu; bya asù iya: “Waa ishi nwa Sọlu ono, bú Ishibosheti ba; mbù ọhogu ngu ono, shi achọ ishi ndzũ ngu ono. Ntanù-a bẹ Chipfu gwatawaru Sọlu yẹle eri iya ̀gwo iphe, èphẹ meru gùbẹ nnajũphu anyi, bú eze.”

⁹No iya; Dévidi bya eyeeru Rekabu yẹle nwune iya nwoke, bú Bana ọnu; mbù ̀unwu Rìmonu, bú onye Berotu ono; sù phẹ: “Eshinu Chipfu nọ ndzũ g'ò nọ iya-a; mbù onye ono, nafutaru mu l'iphe-ẹhuka; ¹⁰bẹ ọo-nwũru unu g'ò nwũru onye ono teke ọ byaru asù mu lẹ Sọlu bẹ nwũhuakwaru nù ono. Ọ gbenu ari lẹ ya byaru mu ezi ozi, dù ree; obenu lẹ mu zuguderu iya gbua lẹ mkpũkpũ Zikulagu. Ono búru obunggo, mu buru iya l'ozì, ọ byaru ezizi. ¹¹?Tọ kabadarọ njo l'ẹka ọ bú ndu ejo-iphe jeru egbua nwoke, adũdu iphe, o meru l'ime ̀lo iya; mbù l'iphe, ọozeje azẹe? ?Tọ buedupho gẹ mu gwata unu ̀gwo mee ọchi iya l'ishi unu nta; mbù wofu unu lẹ mgboko-a?” ¹²Ọo ya bú; Dévidi bya ezia ̀unworoobyia iya; èphẹ gbushia phẹ. Èphẹ kwashia phẹ ẹka yẹ ọkpa; pakọo ogwẹhu phẹ je eko-be lẹ mgboru okpuru, nọ lẹ Hẹburonu. Èphẹ pata ishi Ishibosheti je elia l'ilu Ábuna lẹ Hẹburonu.

Eeme Dévidi eze ndu Ízuru l'ophu

(1Iphẹ 11:1-9)

5 ¹Tọbudu iya bú; ipfu ndu Ízuru l'ophu tũko byapfuta Dévidi lẹ Hẹburonu bya sù iya: “Anyi lẹ ngu tũkoru búru mee lanù waa ogwẹhu lanù. ²Tẹme; teke Sọlu shi búru eze anyi; bẹ búkwa gùbedua shi edujueru ndu Ízuru eje ejeje alwa alwalwa l'ọgu. Ọ búru ngu bẹ Chipfu sũru l'ọo ngu a-nọdu eche ndu nkiya, bú ndu Ízuru g'onye eche atũru; mbù l'ọo ngu a-bũru onye-ishi phẹ.” ³Ọo ya bú; iphe, bú ndu bú ọgerenya Ízuru bya awũ-pfu eze, bú Dévidi lẹ Hẹburonu; èphẹ l'iya gbaa ndzũ l'iphu Chipfu; èphẹ wũa Dévidi manù g'ò búru eze ndu Ízuru. ⁴Dévidi nọwaru ̀kporo apha l'apha iri teke e meru iya eze. Iphe, ọ nọru l'aba-eze bú ̀kporo apha labọ. ⁵Teke o bu lẹ Hẹburonu bẹ ọ nọru l'aba-eze ndu Jiuda apha ẹsaa l'onwa ishii. Ọ bya anọdu lẹ Jierúsalemu búru eze ndu Ízuru l'ophu yẹle ndu Jiuda ̀kporo apha l'apha iri l'eto.

⁶Eze, bu Dévidi yèle ndu nkiya wùru jeshia ogu lẹ Jierúsalemu, bu iya bu Jiebusu. O buri ndu Jiebusu bẹ bu l'alì ono teke ono. Ndu Jiebusu ono bya asu Dévidi: “?A suru ngu l'ì dù ike abata l'ẹka-a; mbu l'o kwa ndu atsù ishi; mẹ ndu eniyeni bẹ a-chiphu ngu azu; mẹ ì -byatashia.” No kele ephe riru lẹ Dévidi ta abyadu adu ike bata l'alì phe. ⁷Ole Dévidi mechalewu-a lwuta ẹka a kpushiru ike, no l'eli úbvú Zayonu, mecharu buru mkpukpu Dévidi.

⁸Mboku ono bẹ Dévidi suru: “Onye a-du ike lwua ndu Jiebusu bẹ e-tSORU òswà-mini bapfu ndu atsù ishi mẹ ndu eniyeni ono, du Dévidi ashi ono.” Oo ya bu iphe ono, eepfuje su: “Ndu atsù ishi mẹ ndu eniyeni ta abyadu a-bahu l'ulo.”

⁹Dévidi bya akwata unuphu l'ẹka ono, a kpushiru ike ono. O woru iya gua mkpukpu Dévidi. O kpa igbulọ mkpukpu ono mgburugburu. O shi l'agbarike igbulọ mkpukpu ono kpa ya bahu l'ime. ¹⁰Dévidi nodu aka ike ejekpopho; kele Chipfu; mbu Chileke, bu Okalibe-Kakota-Ike swiru iya eswiru.

¹¹Tobudu iya bu; Hiram, bu eze ndu Taya bya eye ndu-ozì iya g'ephe vutaru Dévidi oshi sida; bya eyekwapho ndu kapyinta; mẹ ndu edoje ẹja ulo; ephe tuko swiru je akpuru Dévidi ulo. ¹²Dévidi bya amaru lẹ Chipfu bẹ mewaru ge ya nguru anguru l'abu eze ndu Izurelu; teme lẹ Chipfu bẹ gudewaa iswi ẹhu ndibe iya ono, bu ndu Izurelu palia alì-eze iya imeli.

¹³Dévidi bya alufutachaephe lẹ Hẹburonu; o latabaa unwanyi, ndu ophu abu-zidu unyomu iya lẹ Jierúsalemu; bya alushia igwerigwe unwanyi. A bya nwushibakwaru iya pho unwegirima; unwoke mẹ unwanyi. ¹⁴Waa ephe unwegirima, a nwushiru iya lẹ Jierúsalemu baa: Shamuwa; mẹ Shobabu; mẹ Nétanu; mẹ Sólomonu; ¹⁵mẹ Ibuha; mẹ Elishuwa; mẹ Nefegu; mẹ Jiafiya; ¹⁶mẹ Elishama; mẹ Eliyada; mẹ Elifeletu.

Dévidi alwu-kpee ndu Filisitayinu

(1Iphe 14:8-17)

¹⁷Ndu Filisitayinu bya anumaephe l'a wuwaru Dévidi manu l'ishi g'o buru eze ndu Izurelu; ephe tuko zelihi; choru Dévidi jeshia. Dévidi numa iya; bya abahu l'ẹka ono, a kpushiru ike ono. ¹⁸Ndu Filisitayinu bya bya ejerwua je edokaa onwophe; ephe dzuru nsuda Refayimu. ¹⁹Oo ya bu; Dévidi bya eje ajita Chipfu su: “?Bu ge mu jepfu ndu Filisitayinu ogu too? ?Ii-woru phe-a ye mu l'eka?”

Chipfu yeeru iya onu su iya: “Jeru ya; le mu e-woru-a ndu Filisitayinu obu ye ngu l'eka.”

²⁰Oo ya bu; Dévidi jeshia mkpukpu Belu-Perazimu; je alwu-kpee phe l'ẹka ono. O su: “?O g'ukporo-mini ekpoje-a bu ge Chipfu kpotaru ndu ohogu mu l'atatiphu mu.” Oo ya meru g'o gude a gua ẹka ono Belu-Perazimu. ²¹Ndu Filisitayinu gbadochaa agwa phe l'ẹka ono; Dévidi yèle ndu nkiya chitakota iya tugbua.

²²E mechaa; ndu Filisitayinu byakwa bya edokaa onwophẹ dzuru nsụda Refayimu. ²³Dévidi byakwa eje ajita Chipfu ozo; Chipfu sụ iya: “Unu te eshikwa p̄hẹ atatip̄hu nhamun̄ha; unu shichikwaa p̄hẹ okotazu; n̄o- p̄hee p̄hẹ mgburugburu l'ip̄hu ẹka ono, oshi balusamu p̄f̄ugbaaru ono tsoo p̄hẹ ọgu. ²⁴Teke unu bebeerup̄ho n̄uma ip̄he, ada g'igiji ọkpa l'eli oshi balusamu ono; unu emekebe ẹgwegwa; noo ọkẹ ọo teke ono bẹ Chipfu vutawaru unu ọzo g'unu je egbushia ndu ojogu ndu Filisitayinu.” ²⁵Noo ya; Dévidi mee ya ẹgube ono, Chipfu ziru iya ono. O shiẹpho lẹ mkp̄kpu Geba gbushia ndu Filisitayinu jasụ lẹ mkp̄kpu Geza.

Eedobe Okpoko Ọgbandzu Chileke l'ibe Óbẹdu-Edomu
(*1Ip̄he 13:1-14; 15:1—16:3,43*)

6 ¹Dévidi byakwa akpakọ-dzua ndu a họtaru lẹ ndu Ízurelu. Ip̄he, ẹp̄he d̄u b̄u ụkporo unu ụmadzu ugbo ẹto l'unu iri l'ise.^a ²Dévidi yẹle ndu nkiya l'ophu t̄ugbua jeshia mkp̄kpu Belu, n̄o l'alì Jiuda g'ẹp̄he je apalata okpoko Chileke; mb̄u okpoko ono, a ḡuru ẹpha Chipfu, b̄u Ọkalibe-Kakota-Ike; mb̄u onye ono, aba-eze iya n̄o lẹ mgbaka cherubimu ono. ³Ẹp̄he bya apafuta okpoko Chileke ono l'ulo Abinadabu par̄u tukobe l'eli ọgba-kperekpere òphúú. Ụlo Abinadabu ono tukoru l'eli úbvú. Ọ buru Uza waa Ahiyo, b̄u un̄wu Abinadabu kẹ nwoke bẹ anga ọgba-kperekpere òphúú ono. ⁴Ẹp̄he ngar̄u ọgba-kperekpere ono, a tukoberu okpoko Chileke ono lufuta l'ibe Abinadabu. Ahiyo vuru okpoko ono ọzo. ⁵Dévidi yẹe ndu Ízurelu l'ophu t̄uko gude ike p̄hẹ g'ọ ha ete ẹswa l'ip̄hu Chipfu. Ẹp̄he n̄odu aḡu ebvu; akp̄o ogomogu; m̄e une; bya ak̄u nkwa; egbu opu; ak̄u ogelenda.

⁶Ẹp̄he rwuẹpho ẹka eechishije ẹswa lẹ balì lẹ Nakonu; Uza t̄ufu ẹka gẹ ya wota okpoko Chileke ono; ọkẹ eswi, alokpu ọgba-kperekpere, a tukoberu iya ono bẹ vukotaru ip̄he. ⁷Chipfu tukoshi Uza ẹhu-eghu iya; ọkẹ ọ to s̄oduru okpoko Chileke ono ns̄o. Chileke woru iya chigbua; ọ nw̄hu lẹ mgboru okpoko Chileke l'ẹka ono. ⁸Ẹhu daa Dévidi kẹ dzu; ọkẹ oke-ẹhu-eghu Chipfu dapfutaru Uza. A n̄odu ekuje ẹka ono Pérezu-Uza byasụ n̄tan̄u.

⁹Ọo ya b̄u; ndz̄u Chipfu ḡuhu Dévidi lẹ mb̄oku ono; ọ s̄u: “?D̄enukpoo g'e-me palata okpoko Chipfu-a?” ¹⁰Ọphu o to vuẹdu Dévidi evuvu g'ọ palata okpoko Chipfu ono lẹ mkp̄kpu Dévidi. Ọ patawa iya ro je edobe l'ibe Óbẹdu-Edomu, b̄u onye Gatu. ¹¹Okpoko Chipfu ono n̄oo on̄wa ẹto l'ibe Óbẹdu-Edomu onye Gatu. Chipfu kebe Óbẹdu-Edomu waa ndibe iya l'ophu l'oma.

Eevulata okpoko Chileke lẹ Jierúsalem̄u
(*1Ip̄he 15:25-29*)

¹²Noo ya; a bya edooru eze, b̄u Dévidi s̄u: “Chipfu gudekwa k'okpoko Chileke-a kebewaa ndibe Óbẹdu-Edomu l'oma; m̄ekpoo ip̄hemip̄he, o nweru

^a 6:1 B̄u iya b̄u 30,000 lẹ mbekee.

enweru.” Oo ya bú; Dévidi teru ẹsua je apafuta okpoko Chileke ono l'ibe Óbèdu-Edomu; palaa lẹ mkpukpu Dévidi. ¹³O nọdu abujeru; ndu pa okpoko Chipfu ono -tụa ntọkpa ishii; Dévidi egbua oke-eswi waa nweswi, ẹba du gude gweeru Chileke ngweja. ¹⁴Dévidi nmaru ẹkwa ocha l'upfu; bya egude ike iya g'ọ ha ete ebvu l'iphu Chipfu. ¹⁵Noo ya; Dévidi yele ndu Ízurelu l'ophu nọdu apalata okpoko Chipfu ono; akpo okwe etso iya; bya egbu opu.

¹⁶A nọdu apabata okpoko Chipfu ono lẹ mkpukpu Dévidi; nwada Sọlu, ẹpha iya bú Mikalu pyofu ẹnya lẹ windo; huma eze, bú Dévidi g'ọnmalihuje anmalihu bya ete ebvu l'iphu Chipfu; ọ nmaa ya phulaphula l'ime obu iya.

¹⁷Oo ya bú; ẹphe bya apabata okpoko Chipfu ono; woru iya dobe l'eka rwuberu iya nù l'ime ọlo-ẹkwa ono, Dévidi kọberu g'e dobe iya ono. Dévidi bya egweshia ngweja-akpo-ọku; mẹ ngweja-ẹhu-guu l'iphu Chipfu. ¹⁸Dévidi gweghechaepfo ngweja-akpo-ọku ono; waa ngweja-ẹhu-guu ono; o gude ẹpha Chipfu, bú Okalibe-Kakota-Ike goru onu-oma nù ndu Ízurelu. ¹⁹O bya ekeeru ndu ono ishi buredi nanu nanu l'ẹhu l'ẹhu; mẹ akara, e meru l'akpuru oshi detu; mẹ akara, e meru l'akpuru vayinu; kezuru iya ndu Ízurelu ono l'ophu; unwoke; mẹ unwanyi. E mechaa; ndu ono l'ophu wukashihu lashichaa ibe pẹ l'ẹhu l'ẹhu.

²⁰O be teke Dévidi larwuru; g'ọ goru onu-oma nù ndibe iya; nwada Sọlu, bú Mikalu gbafuta gba Dévidi ndzuta bya asu iya: “Eze ndu Ízurelu bvubenakwaru onwiya ebvube ntanu-a. O gbabechakwaru onwiya oto l'iphu unwumboko, bú ohu ndu e jeru iya ozi; mbu egube ono, iphere abvuje mkpokoro nemadzu l'iphu; loogbabe onwiya oto-a.”

²¹Dévidi su Mikalu: “Oo l'iphu Chipfu be ọ bú; mbu onye ono, haru nna ngu mẹ onye ozo, shi lonulo nna ngu hotachia mbedua ge mu buru onyeshi ndu ke Chipfu ono, bú ndu Ízurelu; mbu-a; mu a-nodu ete esua l'iphu Chipfu. ²²Mu a-kabakpokwanu eme g'o to nwedu iphe, mu bú; eme lowana, mu meru-a. Lenya nkemu be mu a-buru onye e wozetaru ali; obenu l'unwumboko ono, bú ohu, iipfuru ono be a-gbenu akwabẹ mu ubvu.”

²³Oo ya bú; ophu nwada Sọlu ono, bú Mikalu anwutaduru nwa jasu mboku, ọ nwuhuru.

Ozi, Nétanu ezi Dévidi

(1Iphe 17:1-15)

7 ¹Tobudu iya bú; ọ bya ebe teke eze bukpowa ebubu l'ibe iya; Chipfu mewa; obu rwua ya ali; ophu ọ tsuhedu ebvu ndu ohogu iya, nonpheru iya mgburugburu; ²eze pfuaru onye mpfuchiru Chileke, bú Nétanu su iya: “Lenu; mbedua bu l'ulo, e gude oshi sida kpua; okpoko Chileke buru l'ulo-ekwa be ọ no.”

³Nétanu su iya: “Iphe, bukpoo iphe, du ngu l'obu; tugbua je emee ya; le Chipfu be swiru ngu eswiru.”

4 O be l'enyashi mbòku ono; Chipfu pfuru yeru Nétanu; sù iya: 5 “Je ezia nwozi mu, bù Dévidi lẹ m̀be Chipfu sùru-a: ?Bù g̀bedua bẹ̀ b̀ onye a-kp̀uru mu ̀lo, mu e-buru? 6 Eshi mbòku, mu dufutaru ndu Ízùrẹ̀lu l'ali Ijiputu byasù ntanù-a bẹ̀ mu te ebujekwaru l'̀lo. Mu shihawaa jepheta ejephe; buk̀p̀erupho l'̀lo-ẹ̀kwa. 7 Lẹ̀kameka ono, mu lẹ̀ ndu Ízùrẹ̀lu jekò-taru ono; ?o nweru teke mu jijeru ndu-ishi ipfu Ízùrẹ̀lu; mb̀u ndu ono, mu sùru g'ẹ̀phe cheje ndibe mu, bù Ízùrẹ̀lu g'onye eche at̀uru ono iphe, meru g'o gude ọ̀phu ẹ̀phe akp̀uduru mu ̀lo sida?

8 “Sù nwozi mu Dévidi lẹ̀-à: ‘M̀be Ọ̀kalibe-Kakòta-Ike, bù Chipfu sùru-a: Mu dufutaru ngu l'ẹ̀gu; ẹ̀ka ẹ̀ku atajẹ̀ nri; g'i ti tsophehẹ̀ at̀uru; g'i byachia bya ab̀uru onye-ishi ndibe mu, bù Ízùrẹ̀lu. 9 Mu shi eswijek̀p̀eruru ngu phò l'ẹ̀kameka, iije; mu t̀uko ndu ọ̀hogu ngu g'ẹ̀phe ha gb̀ufu l'iphu ngu. Nta-a bẹ̀ mu e-me ẹ̀pha ngu g'ọ̀ paa ẹ̀ka g'ẹ̀pha ndu oke amad̀u, e nwegbaaru lẹ̀ mgboko. 10 Mu a-nù ndibe mu, bù Ízùrẹ̀lu alì ẹ̀ka phe. Mu a-dzabẹ̀ phe g'oshi l'ali ono; k'ọ̀phu ẹ̀phe e-buru l'ali ẹ̀ka phe. Ẹ̀ka ono ta ad̀udu onye byaru l'a-chòbaa phe opfu ozo. Ọ̀phu ndu ẹ̀jo-iphe ta abya-dù emekpabaa phe ẹ̀hu g'e shi emekpa phe iya lẹ̀ mb̀u phò; 11 mb̀u g'e shi emekpa phe iya; a-gbẹ̀ teke ono, mu họtaru ndu-ikpe g'ẹ̀phe dua ndibe mu, bù Ízùrẹ̀lu ono. Mu e-mekwaphò g'ọ̀gu dabuhuru g̀u lẹ̀ ndu ọ̀hogu ngu; obu erwua ngu alì. M̀be Chipfu bẹ̀ epfukwaru ngu phò lẹ̀ mu e-me g'ọ̀nulo ngu ng̀uru ang̀uru. 12 Teke ndz̀u ngu bv̀erupho; mb̀u ì-lapfue-pho nna ngu phe; bẹ̀ mu e-shi l'̀nwu ngu wofuta onye a-nò-chi ẹnya ngu; mb̀u onye e-shi l'ẹ̀hu ngu gèdegede. Mu emee g'alì-eze iya ng̀uru ang̀uru. 13 Ọ̀ buru onye ono bẹ̀ a-kp̀uru m̀be Chileke ̀lo. Mu emee g'aba-eze iya ng̀uru ang̀uru jasù lẹ̀ tuutuutuu lẹ̀ m̀m̀imimii. 14 Mu a-b̀uru nna iya; yẹ̀bedua ab̀uru nwa mu. O -mee ẹ̀jo-iphe; mu egude ẹ̀chachi ndiphe hùá ya àhùhù; mb̀u chia ya ẹ̀chachi ̀nwu-eliphe. 15 Mu ta abyad̀u e-wofu n-ye-mobu mu l'ẹ̀hu phe; ẹ̀gube ono, mu wofuru iya l'ẹ̀hu Sọ̀lu; mb̀u onye ono, mu wofuru l'iphu ngu ono. 16 Ọ̀nu-̀lo ngu waa alì-eze ngu bẹ̀ e-keru ekeru l'iphu mu jasù lẹ̀ tuutuutuu lẹ̀ m̀m̀imimii. Mb̀u-a; aba-eze ngu bẹ̀ ee-me g'ọ̀ ng̀uru ang̀uru jasù lẹ̀ tuutuutuu lẹ̀ m̀m̀imimii.’ ”

17 Noo ya; Nétanu kòkòtaru Dévidi iphe ono ẹ̀gube e pfuru iya ya; mẹ̀ g'ọ̀ hùmaru iya l'ophulenyà.

Dévidi epfu anù Chileke

(Iiphe 17:16-27)

18 Ọ̀o ya b̀u; eze, bù Dévidi gbẹ̀shi bahù l'ime ̀lo-ẹ̀kwa Chileke je anọ̀du l'iphu Chipfu bya asù: “G̀be Nnajiuphu, bù Chipfu; ?b̀u onye bẹ̀ mu b̀u? tẹ̀me ọ̀nu-̀lo mu ?bukwanu g̀nu; kẹ̀ g'i wolìa mu je apfube l'ẹ̀ka ha l'eli ẹ̀gube-a? 19 Ọ̀phu ono atsùdu iya g̀be Nnajiuphu, bù Chipfu l'enyà; ì bya atufua ọ̀nu g'ọ̀nulo onye-ozì ngu a-d̀u l'iphu yekòbefua ya. ?B̀u ẹ̀gube ono b̀u g'iigudeje ehe nemadz̀u; g̀be Nnajiuphu, bù Chipfu? 20 ?B̀u g̀nu

ozo bẹ mube Dévidi e-pfubaaru ngu? I makotaru gẹ mube onye-ozu ngu gbaru; gube Nnajiuphu, bu Chipfu. ²¹I gude k'iphe, i pfuru; waa g'o du ngu l'obu; mee eze iphe, ha egube-a; bya emee gẹ mube onye-ozu ngu maru iya.

²²“Egube g'i habekwanu shii gube Nnajiuphu, bu Chipfu! O to dudu onye du gẹ ngu; ophu o dudu Chileke ozo, du nu; gbahaa gubedua; mbu egube ono, anyi gude nchi anyi numawa iya ono. ²³?Denukpoo ndu ozo, dūbaa gẹ ndu nkengu, bu ndu Izurelu; mbu oha lanu le mgboko-a, gube Chileke jeru je agbafuta g'ephe buru ndu nkengu; bya egude phe mee g'a maru epha ngu amaru; bya emee iphe, pagbaaru eka; bya adu biribiri l'ali phe; l'iphu ndibe ngu ono, bu ndu ono, i gbafutaru l'eka ndu Ijiputu; teme i chikashikwaapho ohamoha ozo yele agwa, ephe agwagbaa l'iphu ndibe ngu ono? ²⁴I mewaru gẹ ndu nkengu, bu ndu Izurelu nguru anguru; buru ndu nkengu gededede jeyewaroya; teme gube Chipfu bya abwaru Chileke phe.

²⁵“Gube Chipfu, bu Chileke; mekwa g'o keru; mbu ukwe-iphe ono, i kweru l'ehu mube onye-ozu ngu; me l'ehu onu-ulo mu ono. G'o rekwa g'i pfuru jasụ le tuutuutu le mimiimii. Mekwa g'i pfuru; ²⁶k'ophu epha ngu a-pa eka apaa jasụ le tuutuutu le mimiimii. O buru teke ono be ndiphe a-su l'oo gube Chipfu, bu Okalibe-Kakota-Ike be bu Chileke ke ndu Izurelu! Teme onu-ulo mube onye-ozu ngu, bu Dévidi angukwarupho anguru l'iphu ngu.

²⁷“Eshi ophu o bu gube Chipfu, bu Okalibe-Kakota-Ike; bya aburu Chileke ke ndu Izurelu be goshiru mube onye-ozu ngu iphe-a su l'ii-me gonulo mu nguru anguru; be bu iya meru g'o gude onu du mube onye-ozu ngu k'anodu epfu anu ngu. ²⁸Gube Nnajiuphu, bu Chipfu; oo ngu bu Chileke! Opfu ngu be bukota okpobe-opfu. I bya ekweshia mube onye-ozu ngu ukwe iphe-oma, dugbaa egube-a. ²⁹G'o dunu ngu l'obu; mbu g'i goru onu-oma obu nuwaro onu-ulo onye-ozu ngu; k'ophu ephe a-nodu eje kwareru l'iphu ngu; noo kele oo gube Nnajiuphu, bu Chipfu be pfuru iya nu. G'onu-oma ngu ono dukwaru onu-ulo onye-ozu ngu jasụ ojejeje.”

Ogu, Dévidi lwugbaberu

(1Iphe 18:1-17)

8 ¹E mecha; Dévidi bya alwu-kpee ndu Filisitayinu; mee ephe nodu iya l'eka. O nafu ndu Filisitayinu ono mkpukpu Metegama. ²Dévidi bya alwu-kpekwaapho ndu Mowabu; mee ephe zeshikota azee; kpoo onwophe giriri l'ali. O bya ewota eri, du ogologo tua phe g'ephe ze giriri ono. Obujeru; o -tuta eri ono ugbo labo l'o woru ndu k'ono gbushikota. O bya atuta k'eto l'o dobe ndu k'ono ndzu. Oo ya bu; ndu Mowabu nodu Dévidi l'eka; bya atukwapho utu anu iya.

³Dévidi bya alwu-kpekwaapho Hadadeza nwa Rehobu, bu eze ndu Zoba le teke o jeru gẹ ya mee g'ali, noru je akpaa lenyimu Yufurétisu lwakota

iya l'èka. ⁴Dévidi nata iya ugbo-inya, dù ọ̀nu labọ́ l'ụ̀kporo iri; bya anata-kwa iya phọ́ ndu ojọ́gu o-je-l'òkpa, dù ụ̀kporo ọ̀nu ugbo labọ́ l'ọ̀nu iri.

⁵Ndu Arámu, bu lẹ́ Damasúkosu byaephọ́ g'ẹ́phe yetarụ́ eze ndu Zoba, bụ́ Hadadeza ẹ́ka; Dévidi gbua phẹ́ ụ̀kporo ọ̀nu ugbo labọ́ l'ọ̀nu iri l'ise.^b

⁶Dévidi bya emeta ọ́du ndu ojọ́gu l'alị́ ndu Arámu kẹ́ Damasúkosu; harụ́ ndu ojọ́gu iya chị́ta dobe iya. Ndu Arámu ono nọ́du Dévidi l'èka; atụ́ ụ́tu anụ́ iya. Chipfu nọ́du emejeephọ́ gẹ́ Dévidi lwụ́-kpee l'ẹ́kameka, o jekpọ́oru ọ́gu. ⁷Dévidi chikoo iphe, ndu-ozí Hadadeza egbobeje gude eze-ru onwophẹ́ ọ́phu e gude mkpọ́la-ododo meshia chílata lẹ́ Jierúsalemụ́.

⁸Dévidi shikwaphọ́ lẹ́ mkpụ́kpu Beta; mẹ́ lẹ́ mkpụ́kpu Berotayi, bụ́kota mkpụ́kpu, nọ́ l'èka Hadadeza; vukọ́o onyirubvu, hakpọ́o shii.

⁹Tọ́budu iya bụ́; Toyi, bụ́ eze ndu Hamatu nụmaephọ́ lẹ́ Dévidi bẹ́ lwụ́-kpekọtawaru ndu ojọ́gu Hadadeza; ¹⁰o ye nwa iya nwoke, ẹ́pha iya bụ́ Jióramu g'o je ekele eze, bụ́ Dévidi ekele; jaa ya ajaja; kele ọ́ lwụ́-kperu Hadadeza. Ọ́ bụ́ru iphe, kparụ́ iya nụ́ bụ́ lẹ́ Hadadeza bẹ́ yẹ́le Toyi shi anọ́duje alwụ́ ọ́gu. Ọ́ bụ́ru iphe, Jióramu gude bya bụ́ ivu, e megbaaru lẹ́ mkpọ́la-ọ́chaa; mẹ́ mkpọ́la-ododo; mẹ́ l'onyirubvu. ¹¹Eze, bụ́ Dévidi woru ivu ono dobechaaru Chipfu iche; ẹ́gube ono, o dobehawaru mkpọ́la-ọ́chaa; yẹ́e mkpọ́la-ododo, shikọ́ta l'ọ́hamoha, ọ́ lwụ́-kpekọtaru phọ́; ¹²mbụ́ ọ́phu shi lẹ́ Edọ́mu; mẹ́ Mówabu; mẹ́ kẹ́ ndu Amọ́nu; mẹ́ ndu Fili-sitayinu; waa ndu Amalẹ́ku. Nokwaphọ́ g'o woru iphe, ọ́ natarụ́ eze ndu Zoba, bụ́ Hadadeza nwa Rehobu l'ọ́gu doberu Chipfu iche bụ́ ono.

¹³Dévidi bya abụ́ru onye a maru amaru g'o shichaephọ́ Nsụ́da Únú lwa; mbụ́ ẹ́ka ono, ọ́ nọ́ gbua ndu Edọ́mu ụ̀kporo ọ̀nu nemadzụ́ ugbo labọ́ l'ọ̀nu ise.^c ¹⁴Ọ́ bya emeshia ọ́du ndu ojọ́gu l'alị́ ndu Edọ́mu l'ophu; chị́ta ndu ojọ́gu yekọ́ta iya. Ndu Edọ́mu l'ophu nọ́dukota Dévidi l'èka. Chipfu nọ́du emeje gẹ́ Dévidi lwụ́-kpee l'ẹ́kameka, o jekpọ́ru ọ́gu.

¹⁵Ọ́o ya bụ́; Dévidi bụ́ru eze ndu Ízurelụ́ l'ophu; ekperu ndu nkiya ono l'ophu ikpe l'ụ́zo, dù ree; mẹ́ l'ụ́zo, p'furu ọ́to. ¹⁶Ọ́ bụ́ru Jiowabu nwa Zeruya bẹ́ bụ́ onye-ishi ndu ojọ́gu. Jiehoshafatu nwa Ahiludu bụ́ru onye akwakọ́beje iphe, meru ememe. ¹⁷Zadọ́ku nwa Ahitubu; yẹ́le Ahimeleku nwa Abyiyata bụ́ru ndu-uke Chileke; Seraya bụ́ru onye edeje ẹ́kwo. ¹⁸Benaya nwa Jiehoyada bụ́ru onye-ishi ndu Kereti waa ndu Pẹ́leti, bụ́ ndu anọ́duje eche eze nche. Ọ́nwu Dévidi unwoke bụ́ru ndu mgbazi eze.

Iphe-ọ́ma, Dévidi meru Mefibosheti

9 ¹Tọ́budu iya bụ́; Dévidi bya ajja sụ́: “?O nwekpọ́ru onye shi l'ọ́nulo Sọ́lu, phọ́duru nụ́ gẹ́ mu gude iswi ẹ́hu Jionatanu meeru onye ọ́bu iphe-ọ́ma?”

²O nweru nwozi ndu ọ́nu-ụ́lo Sọ́lu, ẹ́pha iya bụ́ Ziba. Ẹ́phe kua ya; ọ́ bya l'iphu Dévidi. Eze, bụ́ Dévidi jị́a ya sụ́: “?Bụ́ gubedua bẹ́ bụ́ Ziba?”

^b 8:5 Bụ́ iya bụ́ 22,000 lẹ́ mbekee. ^c 8:13 Bụ́ iya bụ́ 18,000, lẹ́ mbekee.

Ziba sù iya: “Ọ kwa-a m̀be nwozi ngu b̀e b̀u iya ǹu.”

³Eze j̀ia ya s̀u: “?O nwekp̀oru onye ph̀oduru ǹu l̀onulo S̀olu g̀e mu mee-ru iya iphe-oma, shi l̀eka Chileke?”

Ziba bya as̀u eze: “O nweru nwa Jionatanu laǹu, ǹokwadu ǹu, b̀u onye ọkpa lab̀o nẁuhuru anẁuhu.”

⁴Eze j̀ia ya s̀u: “?B̀u l̀awe b̀e ọ ǹo?”

Ziba s̀u l̀o ǹokwa l̀ibe Makiya nwa Amiỳe lu l̀e mkp̀ukpu Lodeba. ⁵No iya; eze, b̀u Dévidi zia g̀'e je Lodeba l̀ibe Makiya nwa Amiỳe lu je eduta iya.

⁶Nwanwa S̀olu ono, b̀u Mefibosheti; nwa Jionatanu ono rwùepho l̀iphu Dévidi; ọ daa l̀alì phozeru Dévidi gude kwab̀e iya ùbv̀u. Dévidi bya ekua ya s̀u: “Mefibosheti!” Ọ za iya ẹnu s̀u: “Ọo nwozi ngu b̀e mu b̀u.”

⁷Dévidi s̀u iya: “Ta ats̀ukwa ebvu; noo k̀e le mu e-gude iswi ẹhu nna ngu, b̀u Jionatanu meeru ngu iphe-oma. Alì nna ngu oche, b̀u S̀olu b̀e mu a-nuphukota ngu az̀u; t̀eme ọ b̀uru l̀e teburu mu b̀e ịi-ǹoduje eri nri mb̀okumboku.”

⁸Mefibosheti phozeta l̀alì s̀u: “?B̀u g̀unu b̀e m̀be nwozi ngu b̀ukwanu k̀e g̀'ì nyata odzu nk̀uta, d̀u g̀e m̀bedua?”

⁹Ọo ya b̀u; eze bya ekua Ziba, b̀u nwozi S̀olu bya as̀u iya: “Mu wowa-ru iphe, b̀u iphe k̀e S̀olu je akpaa l̀e k̀e ndu ọnu-ulo iya g̀edegede woru ǹu nwanwa nnajìuphu ngu. ¹⁰G̀ubedua waa ̀unwu ngu; m̀e ndu-ozì ngu b̀e a-kojeru iya alì iya ono; k̀otaje nri k̀'ophu nri a-d̀uru nwanwa nnajìuphu ngu. Ọzo b̀u l̀e nwanwa nnajìuphu ngu ono, b̀u Mefibosheti b̀e a-ǹoduje eri nri l̀e teburu m̀bedua, b̀u Dévidi.” Teke ono b̀e Ziba nẁutaru unwoke iri l̀ise; bya enweru ndu-ozì ̀ukporo.

¹¹T̀obudu iya b̀u; Ziba s̀u eze: “M̀be nwozi ngu b̀e e-mek̀otaepho iphe, g̀ube nnajìuphu mu, b̀u eze ziru mu g̀e mu mee.”

No iya; Mefibosheti riahaa nri l̀e teburu Dévidi g̀'ọ b̀u nwatibe eze.

¹²Mefibosheti b̀e nẁutaru nwata nwoke nshìjì, ẹpha iya b̀u Mayìka. Ndibe Ziba l̀ophu t̀ukoru b̀ukotarù ndu-ozì Mefibosheti. ¹³Ọo ya b̀u; Mefibosheti buru l̀e Jierúsalemù; k̀e le ọo-ǹoduje eri nri l̀e teburu eze; t̀eme ọ b̀uru ẹniyenu, ọkpa lab̀o nẁushihuchaaru anẁushihu.

Ọgu, Dévidi ye le ndu Amọnu alwu

(1Iphe 19:1-19)

10 ¹A nọnyaa; eze ndu Amọnu bya anẁuhu. Nwa iya nwoke, b̀u Hanunu bya ab̀uru eze ǹochia ẹnya iya. ²Dévidi bya epfua s̀u: “Mu e-meru Hanunu nwa Nahashi ree; ẹgube nna iya meru m̀bedua.” Ọo ya b̀u; Dévidi zia ndu-ozì g̀'ephe je akp̀oru Hanunu iphu nna iya ono.

O be g̀e ndu-ozì Dévidi ono rwuru alì ndu Amọnu; ³ndu-ishi ndu Amọnu s̀u Hanunu, b̀u nnajìuphu ph̀e: “?Iiri l̀'ọo ùbv̀u b̀e Dévidi akwab̀e nna ngu ẹgube ono meru g̀'ọ gude o zia g̀' a bya akp̀oru ngu iphu nna ngu?”

?Tòbudu ezizi bẹ Dévidi ziru g'èphe nwúa mkpùkpu-a ngge; genwushia ya èhu; woru iya lwúa?"

⁴Ọo ya bụ; Hanunu gudeshia ndu ono, Dévidi ziru ozi ono kpùshichaa phẹ éjí-agba ibe lanụ ibe lanụ; bya eshi lẹ nhamunha ike bukashia uwe-mgbalanụ phe; nwufu phe; ephe lashia. ⁵O be teke e pfuru iya Dévidi; o zia g'a gba phe ndzuta; kele e meru phe iphe-iphere parụ ẹka. Eze zia ozi sụ phe: "Unu nọdu lẹ Jieriko jeye teke éjí-agba unu erwudzu; tẹme unu alwatashiwaro."

⁶Ndu Amọnu bya amaerupho l'ephe eshiwaa tukurubaa l'imi Dévidi; ephe je ebuta ndu ojogu ndu Arámu, bu lẹ Bẹtu-Rehobu; mẹ ndu kẹ Zoba. Ephe tukuru buru ndu ojogu, eje l'okpa. Iphe, ephe tukuru dụ bụ ukporo unu unwoke ugbo labo l'unu unwoke iri. Ephe butafua eze ndu Maka; yele ndu ojogu, dụ unu labo l'ukporo iri; bya ebutafua ndu Tobu unu unwoke ukporo l'iri yeru onwophe. ⁷Anuma, Dévidi anuma iya; o yefu Jiowabu yee ndu ojogu iya g'ephe ha. ⁸Ndu Amọnu wufuta bya akpoo giriri k'ogu l'iphu ẹka eeshije abahu lẹ mkpùkpu ono. Ndu kẹ Arámu pho, shi lẹ Zoba; mẹ Rehobu; mẹ ndu shi l'alí Tobu; waa ndu kẹ Maka nọdu l'oma egu.

⁹Jiowabu humaepho l'e gburu iya giriri iphu l'azu k'ogu ono; o hokoo ndu Ízurelu ndu ophu kachaa amaru k'ogu chiru phe ye g'ephe kwaberu ndu kẹ Arámu. ¹⁰O chiru ndu ophuu dobe g'ephe nọdu nwune iya, bụ Abishayi l'eka kwaberu ndu kẹ Amọnu. ¹¹Jiowabu sụ: "O -buru lẹ ndu Arámu-a lwùkpeaharu mu; unu abya eyetaru mu ẹka; teke o bukwanu l'ọo ndu kẹ Amọnu lwùkpeaharu unu; anyi abya eyetaru unu ẹka. ¹²G'obu shihu unu ike; g'anyi lwúa ogu èhu ndibe anyi gẹ ndu bụ mkparawa; mbụ g'anyi lwúa ogu l'iswi èhu mkpùkpu kẹ Chileke. Chipfu e-me-a iphe, dụ iya ree l'anya nkiya."

¹³Ọo ya bụ; Jiowabu yele ndu nkiya tuko wụ-pfuahaa ndu Arámu k'ogu ono; ephe ye okpa l'oso gbalaaharu iya agbala. ¹⁴Ndu kẹ Amọnu humaepho lẹ ndu Arámu gbalaru; ephebedua yefua okpa l'oso nkephe gbalaaharu Abishayi; gbaru gbaba lime mkpùkpu phe. Ọo ya bụ; Jiowabu shi l'ogu ephe lẹ ndu Amọnu ono lwatashia Jierúsalem.

¹⁵Ndu Arámu humaepho lẹ ndu Ízurelu lwù-kpewaru phe; ephe je edzukobe. ¹⁶Hadadeza zia ndu Arámu, nọ l'azu enyimu Yufurétisu; ephe bya. Shobaku, bụ onye-ishi ndu ojogu Hadadeza duta phe; ephe wuru laa mkpùkpu Helamu. ¹⁷E pfueru iya pho Dévidi; o kpakoo ndu Ízurelu l'ophu; ephe daa azu enyimu Jiódanu jeshia Helamu. Ndu Arámu ono kpoo giriri; tsoo Dévidi phe ogu. ¹⁸Ndu Arámu ono mechaa gbaaru ndu Ízurelu oso. Dévidi gbua ndu ugbo-inya, dụ unu l'ukporo iri l'ise; bya egbua ndu ojogu o-je-l'okpa, dụ ukporo unu ise;^d bya egbutsua Shobaku, bụ onye-ishi ndu ojogu phe; o nwuhu l'eka ono. ¹⁹Ọo ya bụ; ndu eze ono,

^d 10:18 Bụ iya bụ 40,000, lẹ mbekee, mbụ ndu ophu eje l'okpa.

èphe lẹ Hadadeza shi tũko nmagba buru nanu ono hũmaepho lẹ ndu Ízuru lẹ lẹwù-kpewaru phe; èphe je; èphe lẹ ndu Ízuru doshia; èphe nõdu ndu Ízuru lẹka. Ndu Arámu tsuaha ebvu jika eyetaru ndu Amõnu eka ozo.

Dévidi anata Uráya nyee ya

11 ¹O be lẹ mini-õduu; mbu teke ndu eze ejeje õgu; Dévidi bya ezia Jiowabu yele ndu-õzi iya; me ndu Ízuru l'õphu; èphe je emebyishia ndu Amõnu; kephee mkpukpu Raba. Dévidi l'onwiya nõdukwanu lẹ Jierúsalemũ.

²O be l'uzenyashi ujiku lanu; Dévidi gbeshi l'iphe-azee ya ge ya kpaphe akpaphe l'eli ulo ibe-eze iya. O nõdu l'eli eka ono tufu enya hũma nwanu, awu ehu. Nwanu ono nõdu amashikpoo mma ike. ³Oo ya bu; Dévidi zia nemadzũ g'o je akpaaru iya ishi onye nwanu ono bu. Onye o ziru su iya: "O kwa Batusheba, bu nwada Eliyamu. O bu nyee Uráya, bu onye Hetu." ⁴Dévidi bya eye ndu-õzi iya g'èphe je edutaru iya ya. Batusheba byaepho; Dévidi duta iya; yee ya kwaa. O buru teke ono be Batusheba fũtaerupho l'eme nsõ aswafu nturwu, eemeje me nwanu nõ-ghechaa nsõ nwanu. E mechaa nwanu ono tũgbua lashia. ⁵Nwanu ono bya atsũta ime; bya ezia Dévidi su iya lẹ ya dukwa ime.

⁶Oo ya bu; Dévidi bya ezia Jiowabu su iya g'o ziaru iya Uráya, bu onye Hetu g'o lwa. Jiowabu bya ezia Uráya g'o je aza Dévidi enu. ⁷Uráya bya abyapfuta iya; Dévidi jia ya aji Jiowabu; me ndu ojogu iya; me g'õgu eje ala. ⁸Oo ya bu; Dévidi bya asu Uráya: "Lashiwaro ibe ngu je atũta unme." Oo ya bu; Uráya bya agbeshi l'ibe eze tũgbushia. Eze gweru iphe nu g'e wolaaru iya unuphu. ⁹Obenu lẹ Uráya be mecharu kwaa l'õnu-abata ibe eze. Èphe lẹ ndu ejeru nnajiuphu iya õzi tũko zee lẹka ono. Ophu o larwuẽduru unuphu ibe iya. ¹⁰A bya epfuaru Dévidi lẹ Uráya ta laekwaru unuphu. O bya aja ya su: "Tõ bunaa eka du enya be i shi lwa nta? Bu gunu meru iphe i ti larwuduru unuphu?"

¹¹Uráya su Dévidi: "Okpoko Chipfu; me ndu Ízuru; me ndu Jiuda; me nnajiuphu mu, bu Jiowabu; me ndu-õzi iya phe be tũkoru wushi l'egu õgu. Denu g'ee-shi ge mbẽdua lashia unuphu je eria; ngua; mu lẹ nyee mu akwaa? Eshinu i nõ ndu g'i nõ iya-a be mu ta abyakwa e-me nno!"

¹²Tõbudu iya bu; Dévidi su iya: "Nõ-gbũfũwaro ntanu-a; o -rwua echele mu aha ngu g'i laphushia azu." Oo ya bu; Uráya nõ lẹ Jierúsalemũ mbõku ono; waa echele iya. ¹³Dévidi bya ekua ya; o bya; yele iya tũko ria ngua. Dévidi kwatakpoõ cheshia ya mee ike. E mechaela; o rwua l'enya-shi; Uráya gbeshikwa je azee lẹka o zee unyaphu iya; èphe lẹ ndu ejeru nnajiuphu iya õzi; õphu o tõ laduru ibe iya.

¹⁴O be l'utsu; Dévidi deeru Jiowabu ekwo-õzi; woru nu Uráya g'o nu iya. ¹⁵O deru l'ekwo-õzi ono su: "Duru Uráya ye l'atatiõphu eka õgu

kachaa ekpohu oku. I -ducharu iya ye; unu alaphu azu g'e meka ya iphe; g'ò nwùhu.” 16E mechaa; o buru teke Jiowabu chiru ndu ojogu iya gbaa mkpukpu ono mgburugburu be o duru Uráya ye l'eka o maru l'oo eka ono be ndu ohogu iya phe, ike kachaa adudu no. 17Ndu mkpukpu ono wufutaepho jepfu Jiowabu phe ogu; a haru ndu ojogu Dévidi gbushia. Uráya, bu onye Hetu yiru le ndu nwuhuru nu.

18 Jiowabu bya ezia ozi kooru Dévidi g'ogu ono gude jee. 19 Jiowabu pfiaru onye ono, o ziru su iya: “I -doghechaerupho eze g'ogu obu jeru la; 20 be o -buru l'ehu-eghu byaru iya l'ehu; o -jiahaa ngu su: ‘?Denu g'o gude unu je anodunuka mkpukpu obu ntse alwu ogu? ?Unu ta amahaada l'ephe a-gbe l'eli igbulu agba apfu? 21 ?Bunaa onye be gburu Abimeleku nwa Jierubeshetu? ?To bunaa nwanyi, no l'eli igbulu mkpukpu Tebezu gude mkpuma, eegudeje egwe nri tugbua ya; o nwuhu? ?Denu g'o gude unu je anodunuka igbulu obu ntse?’ Su-a; o -buru l'o jiru ngu egube ono; su iya le nwozi iya, bu Uráya onye Hetu be nwuhufukwarupho ya.”

22 Nwozi ono tugbua jeshia. O jerwua je atuko iphe, Jiowabu ziru iya zikota Dévidi. 23 Nwozi ono su iya: “Ndu ono be nabaru anyi eka; wuru wu-pfuta anyi ogu l'oma egu. Ole anyi chiphuru phe azu jeye anyi rwua l'onu eka eeshije abahu le mkpukpu phe. 24 Oo ya bu; ndu chi arwa nodu l'eli igbulu atu ndu-ozu ngu arwa. Ephe haru tu-gbushia ndu-ozu gube eze. Ozo bu le nwozi ngu, bu Uráya onye Hetu yikwapho le ndu nwuhuru nu.”

25 Dévidi bya ezia nwozi ono; su iya: “Iphe, ii-pfuru nu Jiowabu bu le mu suru g'ehu be jekwa unu arwushihu; noo kele oo ge nkogo taru ishi onye lanu bu g'oo-ta k'onye ozo. Unu kukebekwa ehuru tsoo mkpukpu ono ogu; lwua phe lwuta. Je epfiaru Jiowabu egube ono gude mee g'obu shihu iya ike.”

26 Nyee Uráya numaeopho le ji iya nwuhuwuru; o raa ekwa iya. 27 Batusheba raghechaepho ekwa ono egube araje iya; Dévidi je eduta iya luhaha. O nwuaru iya nwa nwoke. Ole iphe ono, Dévidi meru ono du Chipfu eji.

Nétanu abaru Dévidi mba k'ejo-iphe, o meru

12 1 Tòbudu iya bu; Chipfu bya ezia Nétanu g'o je ibe Dévidi. Nétanu jerwua bya asu iya: “O nweru unwoke labo, bu le mkpukpu lanu. Onye lanu be nweru iphe; onye ophuu buru onye ukpa. 2 Onye k'ono nweru iphe ono be kwatakporu nweru aturu waa eswi, paru eka apaa. 3 Obenu l'onye ukpa pho te enwedu iphe, o nweru; gbahaa nwada aturu, o zutaru azuta; chee ya jasu o nodu ye le unwegirima ibe iya l'eka vuta. Nwoke ono ye le aturu iya ono nodu anoduje erigba nri; tuko angu mini l'okoro lanu; mbu je akpachaa k'ophu bu l'oohejeru nwaturu ono eheru l'o ku mgbenya. Aturu ono nodu onodu nwada iya. 4 Tòbudu iya bu; ebyaa byaru nwoke ono, nweru iphe ono; o haa akputa aturu iya ono nanu; ozo eswi iya pho

nanù gbua gude shiaru onye byaru ibe iya nri; ọ gbẹ-chia je akpụta nwada aturu k'onye ukpa phọ gbua gude shiaru onye byaru nù ono nri.”

⁵Dévidi vọru ọku wụa ẹhu l'opfu ẹhu onye ono; bya asụ Nétanu: “Eshinu Chipfu nọ ndzụ g'ọ nọ iya-a bẹ iphe, gbaru onye meru egube iphe ono bẹ bukwa anwụhu! ⁶Ọ pfufutaje ugwo aturu ono ugbo ẹnọ; eshinu o meru egube iphe ono; ọphu imemini onye ukpa ono adudu iya.”

⁷Tobudu iya bụ; Nétanu sunu Dévidi: “Ọo gubedua bụ onye ọbu! Chipfu, bụ Chileke kẹ Ízurelú pfuru sụa: ‘Mu wuru ngu manù l'ishi g'ì buru eze, ndu Ízurelú. Mu byakwaphọ anafuta ngu l'ẹka Sọlu. ⁸Mu woru ọlo Sọlu, bụ nnajiuphu ngu ye ngu l'ẹka; wocharu unyomu iya ye ngu l'ẹka. Mu woru alì-eze ndu Ízurelú; mẹ kẹ Jiuda woru ye ngu l'ẹka. Mbụ; ọ -buru l'iphemiphe ono bẹ pehuru nù; bẹ mu gege eyekwabakporu ngu iya iphe. ⁹?Denu g'ọ gude; ọ buru Opfu Chipfu bẹ ì kporu ẹbo l'afu; shi nno mee iphe, dū iya ẹji l'ẹnya? I gude ogu-echi gbua Uráya onye Hetu; duta nyee ya lụahaa. Ọ buru ogu-echi ndu Amọnu bẹ ì gude gbua ya. ¹⁰Iphe, ìi-maru bụ l'egbu ọchi ta abyadu abvụ abvubvu l'ibe ngu jasuru asuru; noo kele o to nwedu iphe, ì guberu mu; teme ì nata Uráya, bụ onye Hetu nyee ya lụahaa.’

¹¹“Chipfu suru-a: ‘Mu e-shi l'ibe ngu vofuta ẹjo-iphe kpube ngu l'ẹhu. Ìi-nọdu rakafu ẹnya; mu anashia ngu unyomu ngu phẹ woru nù onye ọzo; mbụ l'oo-jepfu unyomu ngu phẹ ono l'echilabọ eswe ọchaa. ¹²I meru nkengu lẹ mpya; ọle mu e-mekwanu ngu nkengu l'atatiphu ndu Ízurelú l'ophu; l'echilabọ eswe ọchaa.’”

¹³Dévidi sụ Nétanu: “Mu meswekwaru Chipfu.”

Nétanu sụ iya: “Chipfu gwaru ngu nvù l'iphe-ẹji, i meru ono. Ì tịi nwuhudu. ¹⁴Obenu l'eshinu ndu ọhogu Chipfu gudewaa iphe-a, i meru-a epfubyishi iya; bẹ nwata ono, a nwuru ngu ono ta adzukurwaru ndzụ.” ¹⁵E mechaa; Nétanu tughua; ọ buru iya ala unuphu.

Anwụhu nwatibe Dévidi ono

Tobudu iya bụ; Chipfu danaa nwata ono ẹka kẹ njo; mbụ nwata ono, nyee Uráya nwataru ono. Iphe-ememe zupyaabe nwata ono. ¹⁶Dévidi rwoahaa Chileke l'iswi ẹhu nwata ono. Ọ swia egu; bahu l'ime ọlo iya je azekota l'alì l'enyashi ono l'ophu. ¹⁷Ndu bụ ọgerenya l'ibe iya bya apfu-ku-be iya g'ephẹ kpu-lia ya l'oma alì ono, ọ zẹ ono; ọphu o to kwedu; teme ọphu o kwekwaphọ tsoru phẹ ria nri. ¹⁸O be lẹ mbọku k'ẹsaa; nwata ono nwuhu. Ndu ozi Dévidi nọdu atsụ ebvu g'ephẹ e-me pfuaru iya lẹ nwata ono nwuhuwaru; kele ephe suru: “Teke nwata ono nọkwadu ndzụ bẹ anyi pfuru yeru Dévidi; ọphu ọ tọ ngaduru anyi nchị. ?Denu g'anyi e-shi pfuaru iya lẹ nwata ọbu nwuhuwaru? Oo-mekakwa onwiya iphe.”

¹⁹Dévidi bya ahuma gẹ ndu-ozì iya achì-phe nwirinwiri l'ime onwophẹ; o rwua ya l'ẹhu lẹ nwata ono bẹ nwuhuwaru nù. Ọ jia phẹ sụ: “?Nwata ọbu nwuhuwaru tọ?”

Ephe sù iya: “Ee; ọ nwùhuakwaru.”

²⁰Ọo ya bụ; Dévidi bya agbèshi l'omali ẹka ọ zẹ ono je awuà ẹhu; nyia manù. Ọ bya agbanwee uwe iya bahù l'ime ọlò Chipfu je abaarù iya aja. O mechaa nno bya alashia ibe iya. Ọ larwua bya asù g'a nù iya nri gẹ ya ria. A nù iya ya; o ria. ²¹Ndu ozi iya bya aja ya; su: “?Denu g'o gude i nọdu emee ẹgube umere ọwa-a? Teke nwata ono nọkwadu ndzù bẹ i shi akwa ẹkwa; aswì ẹgu. Ọ bụ-chiaru nta-a, ọ nwùhuwaru-a bẹ i gbèshuru ria nri!”

²²Dévidi sù phẹ: “Mu shi akwa ẹkwa; aswì ẹgu teke nwata ono shi nọdukwadu ndzù; kẹle mu riru su: ‘?Bù onye maru mẹ Chipfu e-meru mu eze-iphe-oma dobe nwata ono ndzù?’ ²³Ọle nta-a g'ọ nwùhuwaru-a; ?bù gunu bẹ mu a-nọdu aswì-doru ẹgu? ?Mu a-dù ike wophuta iya azù ọzo tọo? Mu e-mechaa jepfu iya; ọle yẹbedua ta alwaẹdu azù alwapfuta mu ọzo.”

Anwunwu Sólomonu

²⁴Ọo ya bụ; Dévidi bya aduà nyee ya, bụ Batusheba obu. Ọ bya alapfu iya; yee ya kwaa. Ọ nwuaru iya nwa nwoke. Dévidi gua nwata ono Sólomonu. Chipfu yee nwata ono obu. ²⁵Chipfu gude kẹ n-yemobu ono, o yeru iya ono zia onye mpfuchiru iya, bụ Nétanu g'o je agua ya Jiedidaya, bụ iya bụ “onye Chipfu yeru obu.”

Jiowabu alwuta mkpukpu Raba

(1Iphe 20:1-3)

²⁶No iya; Jiowabu je etsoo mkpukpu Raba ọgu. Mkpukpu ono dù l'alì ndu Amonu. Ọ lwua ya lwuta ẹka onye eze phẹ bu. ²⁷Jiowabu bya ezia ndu-ozì iya g'e je ezia Dévidi ozi; sù iya-a: “Mu tsoakwaru mkpukpu Raba ọgu; natachawa phẹ ẹka ẹphe shi angù mini. ²⁸Ọo ya bụ; kpakọo ndu ojogu ophu phoduru nù bya ekepheta mkpukpu ono; nata iya; teke mu a-gbẹ nata iya; e woru ẹpha mu gua mkpukpu ono.” ²⁹Ọo ya bụ; Dévidi bya akpakọo ndu ojogu ono g'ẹphe ha; bya achiru phẹ jeshia mkpukpu Raba. O-rwua; bya abapfu phẹ ọgu; lwuta mkpukpu ono. ³⁰O kputa eze phẹ okpu-eze, o kpu l'ishi. Ẹrwa mkpọla-ododo, e gude mee okpu-eze ono bẹ dù talentu lanù. Ọ buri mkpuma, vu oke aswa bẹ nọ iya nù. E woru okpu-eze ono kpube Dévidi l'ishi. Dévidi kwatakwapọ okwata, parù ẹka lẹ mkpukpu ono. ³¹O rwukọo ndu mkpukpu ono dobe g'ẹphe gudeje soya; yele ikworo-igwè; waa ogbunkù jeaha ozi; bya eye phẹ g'ẹphe yoje aja ọlò. Ọ buri ẹgube ono bẹ o mekotaru mkpukpu, nọkota l'alì ndu Amonu l'ophu. E mechaa; Dévidi yele ndu ojogu iya l'ophu laphushia azù lẹ Jierúsalemu.

Amunonu emerwù nwanna iya, bụ Tama

13 ¹Abusalomu; nwa Dévidi nweru nwune nwanyì, ama mma, ẹpha iya bụ Tama. A nonyaa; nwa nwoke Dévidi ọzo, aza Amunonu

bya eyee Tama obu. ²Èhu gbangahù Amùnonu k'òphu ò búwaro iphe-ememe zúpyabe iya lẹ k'òpfi èhu nwanna iya ono, bú Tama. Ò búru iphe, nyíberu Amùnonu g'oo-shi gẹ ya kpabata iya; kele Tama bú nwamgbòko, yẹ nwoke ta akwajẹduru. ³Noo ya; Amùnonu ono bẹ nweru ònyà, ẹpha iya bú Jionadabu nwa Shimeya; mbù nwa nwune Dévidi. Jionadabu ono bú onye ẹregede. ⁴Ò bya ajía Amùnonu sù: “?Bù gùnu kparù iphe, ò bú nnata gùbe nwatibe eze abùjeru ọtsu g'ùtsu; l'ì nwùpyashihu ẹgube-a? ?Tìi kadùru mu iphe ọbu?”

Amùnonu sù iya: “Mu yeru Tama obu; mbù nwune Abùsalomu, bú nwan-na mu ono.”

⁵Jionadabu sù iya: “Je azẹ azẹ l'iphe-azẹe ngu; mekiritaru g'iphe-eme-me eme ngu. Nna ngu -byaẹ ngu phọ ajiji; sù iya l'ìrwo iya g'ò haa Tama, bú nwanna ngu nwanyì g'ò bya anù ngu nri g'ì ria. G'ò nọdukwanu ngu l'iphu mee nri ọbu gude ẹka iya nù ngu iya g'ì ria.” ⁶Òo ya bú; Amùnonu kwe je azẹe g'onye iphe-ememe eme.

Eze byaẹ ya phọ ajiji; Amùnonu sù iya: “Jiko gẹ nwanna mu nwanyì, bú Tama byanù bya anọdu mu l'iphu ghee akara nù mu gẹ mu taa.”

⁷Tòbudu iya bú; Dévidi zia g'e zia Tama l'ẹka ò nọ l'unuphu; sù iya g'ò tųgbua je l'ùlo nwanna iya, bú Amùnonu je emeeru iya nri. ⁸Tama bya atųgbua jeshia l'ùlo nwanna iya Amùnonu; o rwua; Amùnonu zẹ azẹe. Tama bya ekpota ukpokutu iphe, eegudeje eme akara bya agwọkobe iya gude mee akara l'iphu iya; bya eworu iya ghee egheghe. ⁹Ò bya achì-ru akara ono ye lẹ gbamųgbamu woru nù iya. Ò jìka iya eriri. Amùnonu sù: “Karù onyenọnu g'ò lufukota l'ẹka-a!” Onyenọnu bya atųko lufuchaa. ¹⁰Òo ya bú; Amùnonu bya asù Tama: “Wobata nri ọbu l'ime mkpuru gude ẹka ngu nùje mu iya gẹ mu ria.” Òo ya bú; Tama pata akara ono, o gheru ono wojeshiaru nwanna iya, bú Amùnonu l'ime mkpuru iya. ¹¹Tama bya ewoerupho nri ono nù iya g'ò ria; Amùnonu zųkobe iya sù iya: “Bya gẹ mu lẹ ngu kwaa; nwanna mu.”

¹²Tama sù iya: “Waawakwa; nwanna mu! Te egudekwa mu k'ike! E te emejekwa ẹgube iphe ono l'alì Ízurelù! Òphu te emekwa ẹbyi ọwana. ¹³A -bya l'èhu nkemu; ?bù aweya bẹ mu a-parù ẹgube iphe-iphere ọwa je? Tẹme gùbedua l'onwongu bẹ a-yìkwaru lẹ ndu emeshi eswe ike l'alì Ízurelù. Jiko pfunuru yeru eze; ò tọo jìkadu g'ì tì lù mu.” ¹⁴O pfua nta; pfua imo; ọphu Amùnonu angaduru iya nchì; o gude iya jepfu k'ike; kele ò ka iya ọkpehu.

¹⁵E mechaa; Tama bya adù Amùnonu ashì k'òphu parù ẹka apaa. Ashì, ò dù iya bya aka shii; e me lẹ g'ò shi yeberu iya obu. Amùnonu bya asù iya: “Gbẹshi tųgbua lashìa!”

¹⁶Tama jìka; sù iya: “Waawaa! Achìchi ọwa-a, ìchì mu gẹ mu lufu-a kabakwa ẹji; eme l'òphu i mewaru mu.” Òphu Amùnonu angaduru iya rọ nchì. ¹⁷O kua onye-ozì iya, eyetajeru iya ẹka sù iya: “Kpufuru mu

nwanyị-a l'iphu; guburu iya ye l'etezi; swọ-chia iphe lẹ mgbo!" 18 Oo ya bu; nwozi iya ono nwufu iya; guburu iya ye l'etezi swọbe iphe lẹ mgbo ono. Tama bẹ yeru ẹguru uwe mgbalanụ, nweru ẹka ogologo; kele ọo egube uwe ono bẹ unwada eze ndu ophu bukwađu unwumgboko, nwoke teke ejepfuswee eyeje. 19 Tama kpota ntụ kpube onwiya l'ishi; woru eguru uwe mgbalanụ ono, o ye ono gbajashia. O chiru ẹka kwẹe l'ishi; rarụ ẹkwa lashia.

20 Nwune iya, bu Abusalomu huma iya bya ajia ya su: "O du ge nwan-na ngu, bu Amunonu mebyiwaru ngu? Noduro nwadoo nwune mu. Oo nwan-na ngu be o bu; te ejekwa evuru iphe ono l'obu." Oo ya bu; Tama je eburu l'ibe nwune iya Abusalomu nodu buru nwanyi, e bufuru ebufu.

21 Eze Dévidi numaepho iphe nwuru nu; ẹhu ghushiahaa ya egu ike. 22 Abusalomu gbaa nkuchi; ophu o pfujeduru opfu oma; ozoo ejo opfu yeru Amunonu. Amunonu du iya ashị; kele o guderu nwune iya nwanyi, bu Tama jepfu k'ike.

Abusalomu egbu Amunonu

23 A bya anochaa apha labo lẹ teke ndu ebushijeru Abusalomu aturu iya ẹji no lẹ mkpukpu Belu-Hazo, no-kube oke ali ndu Ifuremu; Abusalomu zia iphe, bu unwoke, eze nwuru nzi g'ephe byakotaru iya lẹ nri. 24 Abusalomu jepfu eze lonwiya je asu iya: "Mube nwozi ngu be ndu ebushije aturu ẹji byakwaru ozi. Mu nodu arwo gube eze ge gu lẹ ndu-ozu ngu tsonuru mu je ẹka ono."

25 Eze su iya: "Waawaa; nwa mu. Anyi ta atukodu abya; kele anyi a-bya aburu ivu-erwa duru ngu." O rwoyo ya nta-a rwoyo imo; ophu o to kwedu lẹ ya e-je. O buru onu-oma be o goru nu iya.

26 Abusalomu bya asu iya: "O -buru li ti byadu; jiko ge nwanna mu Amunonu tsonuru anyi je!"

Eze jia ya; su: "Bu ke gunu be oo-gude tsoru unu je?" 27 Abusalomu rwohiahaa ya ike; o kweta ge Amunonu yele unwu eze Dévidi ndu k'ophuu tsokotaru iya je.

28 Noo ya; Abusalomu bya akaru ndu-ozu iya; su phe: "Unu tonwube enya maru teke Amunonu nguwaru mee; o nodu atsu iya atsutsu. Mu -su unu g'unu chitsua Amunonu; unu woru iya chigbua. Unu ta atsukwa ebvu. Oo mbedua ziru iya unu. Unu shihu obu ike; mee okpehu!" 29 Ndu ozi Abusalomu mee Amunonu iphe, o ziru g'ephe mee ya. Oo ya bu; unwoke, eze nwushiru ono wu-lihu; onyenonu pfukotachaa inya-mulu iya; gbalaa.

30 Epehe nodukwadro l'uzo; ozi gbẹ ruwanu Dévidi nchi lẹ Abusalomu gbushikotawaru unwoke, eze nwuru; lo to nwedu onye ophu phoduru nu. 31 Eze zilihu; ye ẹka l'uwe iya gbajashia. O gwodoshihu l'ali. Ndu ozi iya pfu-kube iya l'eka ono tuko uwe phe gbajashikwaapho. 32 Jionadabu;

nwa Shimeya; mbù nwa nwune Dévidi bya asù: “Nnajiuphu mu; ba ari-shi l'unwu-eze bẹ e gbushikotawaru. Oo Amunonu kpoloko bẹ nwuhuru nù. Oo iphe Abusalomu shihawaa rita k'ememe e -shi mboku ono, Amunonu guderu nwune iya nwanyi, bụ Tama k'ehuka jepfu pho. ³³Su-a; gẹ nnajiuphu mu, bụ eze ba chishiru uche ye l'a sùru l'unwu-eze nwushihu-kotawaru. Oo Amunonu kpoloko bẹ nwuhuru nù.”

³⁴E mecha; Abusalomu ye okpa l'oso gbala.

Oo ya bụ; nwoke, echeje nche palia ɛnya huma ikpoto ndu nọ lẹ gbororo l'uzo azu iya; g'ephe shi l'aguga úbvú eje abya. ³⁵Jionadabu bya asù eze: “Lenu; unwu gube eze alwaakwa. Oo epho gẹ mube nwozi ngu pfuru bụ g'ọ nwuru.” ³⁶Oo ya bụ; epfughe, oopfughe nno; unwu-eze ono wubata; chiahaa mkpu ekwa. Eze yele ndu-ozì iya g'ephe ha tuko chiswee ekwa; rashikpoọ ya ike.

³⁷Abusalomu gbalaa lapfushia Talumayi; nwa Amihudu; mbù eze ndu Geshu. Dévidi nọdu anọduje ara ekwa nwa iya ono mbokumboku. ³⁸Abusalomu gbaru laa Geshu ono je anọ apha ẹto l'eka ono. ³⁹A nonyaa; oghoroko Abusalomu bya adushia eze, bụ Dévidi ike; kele a dutawaru iya lẹ k'anwuhu Amunonu.

Abusalomu alwaphuta azu lẹ Jierúsalemù

14 ¹Noo ya; Jiowabu; nwa Zeruya bya amaru l'oghoroko Abusalomu bẹ dushi eze ike. ²Oo ya bụ; ọ bya eye nemadzù g'o je mkpukpu Tekowa je ekuaru iya nwanyi, maru iphe l'eka ono; sù iya: “Mekiritaru g'i bụ onye nọ l'aphu. Yee uwe onye nọ l'aphu. Ta anyikwa manù mbeleke. Mekpoeppo g'i bụ nwanyi, shi teke dù ɛnya nọduta l'aphu onye nwuhuru anwuhu. ³Li jepfu eze je epfuaru iya egube ono.” Oo ya bụ; Jiowabu bya ezikota iya iphe oo-pfu.

⁴Nwanyi Tekowa ono bya ejepfu eze gẹ ya pfuru yeru iya; bya adaa kpurumu l'iphu iya; woru iphu kpube l'alì gude kwabẹ iya ùbvù. O bya asù eze: “Gube eze; jiko yenuru mu aka!”

⁵Eze jia ya sù: “?Bù gunu bẹ atsu ngu l'ehu?”

O sù iya: “Mu bụ nwanyi, ji iya anọedu; mbù lẹ ji mu nwuhuwaru. ⁶Mube nwozi ngu nwanyi buru unwoke labo bẹ mu nwutaru. Su-a; ephe-nebo wata alwu ogo l'egbudu; ophu ọ dudu onye nọ l'eka ono; k'oplu e gbokaharu phe. Onye lanu chita ibe iya tua; woru iya chigbua. ⁷Noo ya; ndibe anyi l'oplu wu-lihu ripyabẹ mube nwozi ngu nwanyi sù mu gẹ mu kpufutafuaru phe onye ophu chigburu nwune iya nwoke pho g'ephe gbua gude gwata ugwo ochi nwune iya nwoke ono, o gburu ono; mbù l'ephe e-wofufua ndzù onye ophu e-ri iphe nna phe. Su-a; ephe eshi nno menyia nwa akpuru icheku-okù lanu ono, mu togboru ono; mbù mee g'epha ji mu mẹ awa iya chihu l'eliphe-a.”

⁸Eze bya asù nwanyi ono: “Tugbua lashia ibe ngu; gẹ mu bya aturu ekemu nù phe l'opfu ehù ngu.”

⁹Nwanyị Tekowa ono bya asụ iya: “Gùbe nnajìuphu mu, bụ eze; g'ùta, e gege ata ngu tukokwaru mu l'ishi; mę l'ishi ọnu-ùlo nna mu. G'ò tọ dụ-kwaro onye eje ata eze; yęe aba-eze iya ụta.”

¹⁰Eze sụ iya: “O -nwekpọwaru onye jeru ngu epfuru; duta iya byapfuta mu; g'onye ọbu aha ngu epfuchi nchi.”

¹¹Ọo ya bụ; nwanyị ono sụ: “Jiko gùbe eze kpọ-kunu Chipfu, bụ Chileke ngu; k'ọphu onye ọ dụ l'ẹka; mbụ agwata ụgwọ ọchi ono a-ha egbu nwa mu nwoke ono.”

Eze sụ iya: “Eshinu Chipfu nọ ndzụ g'ọ nọ iya-a bę ẹgbushi, nọ nwa ngu l'ishi ta abyakwa erifu mę nanụ daa l'ali.”

¹²Noo ya; nwanyị ono sụ: “Gę mụbe nwozi ngu nwanyị pfufunaaru akpuru opfu lanụ yeru gùbe nnajìuphu mu, bụ eze.”

Ọ sụ iya: “Pfulkpọoroọ ya.”

¹³Nwanyị ono sụ iya: “?Dęnu g'ọ gude gùbe eze mee ndibe Chileke ẹgube ejo-iphe ọwa-a? ?T'ọ bụdu ikpe bę gùbe eze anma onwongu l'iphe ono, iipfu nta-a ono; kele nwa ngu phọ, a chifuru achifu phọ bę gùbe eze teke eduphutadụ azụ. ¹⁴G'anyi ha nwuhufutaje anwuhu. Anyi dụ gę mini, wushihuru l'ali, te nweędu g'ee-shi kukọbe iya l'iphe ọzobaa. O to nwedu onye Chileke gufuru anwuhu l'ẹhu iya. Ọ chia iphe, oomeje bụ l'ọcho-je ụzo, ee-shi g'onye a chifuru achifu lwaphuta azụ lwapfuta iya. ¹⁵Sụ-a; mu byaru gę mu pfularu iya gùbe nnajìuphu mu, bụ eze; kele ndiphe męwaru ndzụ nọdu agụ mu. Mụbe nwozi ngu nwanyị rịa sụ lę mu e-pfuru yeru gùbe eze; ?a maru; ?l'i-meru nwozi ngu iphe, ọo rwọ ngu. ¹⁶Mbụ; ?a maru gùbe eze a-nụma opfu mu nafuta mụbe nwozi ngu l'ẹka nwoke ono, achọ ụzo, oo-shi gbua mu lę nwa mu; nafu anyi okiphe, Chileke nuru anyi ono? ¹⁷Ọo ya bụ; mụbe nwozi ngu nwanyị pfua sụ: ‘Jiko g'opfu gùbe nnajìuphu mu, bụ eze mekwaa gę meji nmapfuru mu’; noo kele nnajìuphu mu, bụ eze dụ g'ọjọzi Chileke, amajeru iphe, dụ ree waa iphe, dụ ẹji. Gę Chipfu, bụ Chileke ngu swikwaru ngu eswiru.”

¹⁸Ọo ya bụ; eze bya aja nwanyị ono sụ: “Ta awachikwaru mu iphe-a, mu eme gę mu jia ngu-a awachi.”

Nwanyị ono sụ iya: “Jinaa mu iphe ọbu; gùbe nnajìuphu mu, bụ eze.”

¹⁹Eze bya aja ya sụ: “?Eka Jiowabu dụ l'iphemiphe-a, iipfu-a tọ?”

Nwanyị ono sụ iya: “Gùbe nnajìuphu mu, bụ eze; eshinu ị nọ ndzụ g'ị nọ iya-a ?bụ onye bę a-lọkata iphe, gùbe nnajìuphu mu, bụ eze pfuru shia ẹkutara; ọzoo loru laa l'ẹkicha? Ee; ọo nwozi ngu Jiowabu bę bụ onye ziru gę mu mee iphe-a; ọ bukwaru iya phọ bę suru gę mu pfua gę mu epfua. ²⁰Ọo nwozi ngu, bụ Jiowabu bę meru iphemiphe ono; k'ọphu ọno-du-a, a nọ nta-a l'a-gbanwe. Gùbe nnajìuphu bę maru mmamiphe g'ọjọzi Chileke; k'ọphu bụ l'ị makotaru iphemiphe, eme lę mgboko-a.”

²¹No iya; eze bya asụ Jiowabu: “Ọ dụ ree; mu e-me iphe ono. Tugbua je edulata nwokorọbya ono, bụ Abusalomu.”

²² Jiowabu daa kpurumu woru iphu kpube l'alì gude kwabẹ iya ùb̀v̀ù; bya etua eze epha. O pfua sù: “Ntanù-a bẹ m̀be nwozi ngu marwetaru lẹ mu d̀ỳ g̀bẹ nnajìuphu mu, b̀ỳ eze l'obu; noo kẹle i meru mu iphe, mu pfuru g'i meeru mu.” ²³ Oo ya b̀ỳ; Jiowabu t̀ỳgbua jeshia mkp̀k̀p̀ku Geshe je eduphuta Ab̀salomu az̀ỳ lẹ Jierúsalemù. ²⁴ Òle eze s̀k̀wanuru g'o jee-kwaphe eburu l'̀l̀o ẹka iya; g'ò t̀ỳ h̀makwa iya ẹnya. Noo ya; Ab̀salomu je eburu l'̀l̀o nkiya; ophu o t̀ỳ h̀majeduru eze atatiphu.

Jiowabu edoshiru Ab̀salomu yee Dévidi opfu

²⁵ L'alì Ízurèlù mgburugburu bẹ o t̀ỳ d̀d̀du nwoke ozo, a jaberu ajaja kẹ mma, ooma g'a ja Ab̀salomu. E -shi l'ishi jasù l'obochi-okpa bẹ o t̀ỳ d̀d̀du ẹka iphe, takuru iya l'ehu. ²⁶ O nodu ab̀jeru; o -kp̀shia ẹgbushi, d̀ỳ iya l'ishi; kẹle ookupe iya aphagapha m'ò nyijee ya pho ẹrwa; l'o wota iya t̀ỳ at̀t̀t̀t̀ maru g'ònyita-be ẹrwa. Ẹrwa ẹgbushi iya buru shekelu ukporo iri bẹ oob̀jeru; mẹ e -gude iphe, ndu eze egudeje at̀ỳ ẹrwa iphe t̀ỳ ya. ²⁷ Unwegirima unwoke ẹto; waa nwata nwaǹỳ lanù bẹ Ab̀salomu nẁt̀aru. Epha nwa iya nwaǹỳ ono b̀ỳ Tama; o buru nwaǹỳ, ama mma.

²⁸ Ab̀salomu bua apha labo lẹ Jierúsalemù; ophu o t̀ỳ h̀majeduru eze iphu. ²⁹ Oo ya b̀ỳ; Ab̀salomu zia g'e ziaru iya Jiowabu g'ò bya gẹ ya zia ya ibe eze. Ophu Jiowabu ekwedu bya iya aza ẹnu. O bya ezia ya k'ugbo ẹbo; o jikakwaphe abyabya. ³⁰ T̀ỳbudu iya b̀ỳ; o bya ezia ndu-ozì iya; sù phe: “Unu lenu; ẹgu, Jiowabu kòru balì bẹ no-kube nkemu. Unu je at̀ỳ ọku.” Ndu ozi iya ono t̀ỳgbua je eworu ọku t̀ỳ ya.

³¹ Oo ya b̀ỳ; Jiowabu t̀ỳgbua jepfu Ab̀salomu l'ibe iya je asù iya: “?B̀ỳ g̀nu meru g'o gude ndu-ozì ngu je at̀ỳ ọku l'egu mu?”

³² Ab̀salomu sù Jiowabu: “Mu ziru ozi g'e zia ngu g'i bya gẹ mu zia ngu g'i jepfu eze je ajja ya: ‘?B̀ỳhunu g̀nu meru iphe, mu shi mkp̀k̀p̀ku Geshe l'watash̀ỳ? O gege akarù mu ree lẹ mu nòkwadu l'ẹka ono.’ Oo ya b̀ỳ lẹ-a; mee gẹ mu h̀ma eze iphu. O -b̀ỳru l'o nweru ẹjo-iphe, mu meru; g'o gbua mu rọ ẹgbgbu.”

³³ Oo ya b̀ỳ; Jiowabu t̀ỳgbua je epfuaru eze iphe ono. Eze bya ekua Ab̀salomu. O byarwuta l'atatiphu iya; bya adaa kpurumu woru iphu kpu-be l'alì. Eze bya etsutsua Ab̀salomu onu.

Ejo idzu, Ab̀salomu achiru Dévidi

15 ¹ T̀ỳbudu iya b̀ỳ; Ab̀salomu bya enweru ugbo-ìnya; waa ìnya k'ẹkiya; waa unwoke ukporo labo l'iri, b̀ỳ ndu evutajeru iya ọzo. ² O nodu ab̀jeru o -rwua l'ònmeawa utsu; Ab̀salomu agbeshi je apfuru l'aguga gbororo eeshije bahù l'ime mkp̀k̀p̀ku ono. Teke o b̀ỳ l'o nweru onye eje echiru eze ichi g'eze kpee opfu ono; Ab̀salomu ekua ya jia ya sù: “?B̀ỳ mkp̀k̀p̀ku awe bẹ i shi?” Onye ono asù iya: “Nwozi ngu shikwa l'ipfu lanù l'ime ipfu ndu Ízurèlù.” ³ Onye obu -pfuchaa iphe o byaru;

Abusalomu asù iya: “Iphe, i pfuru dukwa ree; bya aburu iphe, pfuru oto; obenu l’o to nwedù onye a-nò-chi enya eze nùma iphe, adaru unu.” ⁴Iphe ozo, Abusalomu epfujefua bu: “Ome o bu l’oò g’a hotaekwadu mu pho ge mu buru onye-ikpe l’alì-a; m’ò bujekwaru iphe, bu onye wotaru mu opfu; ozo onye byaru echia mu ichi; mu ekpejeepho ikpe ono; kperu iswi-òdu-mma nù iya.” ⁵Nokwapho g’ò bujeru; o -duru onye byapfutaru iya nù ge ya phozeta l’iphu iya; kele iya ekele; l’ò machia eka; nmatachia onye obu akpa; tsutsua ya onu. ⁶Noo ge Abusalomu shi emeje iphe, bu ndu Ízurelu, gude ikpe abya ibe eze bu ono. O shi nno mee; o buru yebedua be ndu Ízurelu yeru obu.

⁷Apha eno lachaepho; Abusalomu sù eze: “Jiko; hana mu ge mu je mkpukpu Heburonu je emeeru Chipfu iphe, mu kweru iya ukwe iya. ⁸Noo kele teke ono, mube nwozi ngu nokwadu le mkpukpu Geshu l’alì Arámu be mu kweru ukwe su: ‘Chipfu -mewaa mu lwaphuta azu le Jierúsalemù be mu a-baru iya eja.’”

⁹Eze sù iya: “Jekwaa l’ehu-guu!” Oo ya bu; o tugua jeshia Heburonu. ¹⁰Abusalomu bya ezia ndu-ozì ephe je ejekota le mpya l’ipfu ndu Ízurelu l’ophu sù phe: “Unu -numaepho oda opu; unu tua uzu su: ‘Abusalomu buakwa eze le Heburonu.’” ¹¹Ndu ephe le Abusalomu shi le Jierúsalemù swiru be du unwoke ukporo iri. Ndu ono be bu ndu e ziru nzi g’ephe bya ebyaa. Ephe gude obu iphóró jeshia; ophu ephe amadu iphe, anwu nu. ¹²Abusalomu gudekwadu ngweja ono l’eka egwe; bya ezia g’e je ekuaru iya Ahitofelu, bu onye mkpukpu Gilo le mkpukpu iya bu Gilo g’o bya. Ahitofelu ono be bu onye mgbazi Dévidi. Noo ya; ejo idzu ono, aachiru Dévidi kabaa eshihu ike; ndu awu etso Abusalomu nodu aka shii eje.

Dévidi agbafu le Jierúsalemù

¹³Tobudu iya bu; nwozi lanu gbaru bya asu Dévidi: “?I maru-a l’obu ndu Ízurelu l’ophu buwaa l’eka Abusalomu no be o dukota?”

¹⁴Dévidi bya epfuru yeru ndu-ozì iya g’ephe ha, bu ndu yee ya tukoru nodu le Jierúsalemù sù phe: “Unu wu-lihukwa g’anyi gbalachaa; odume-ka be o to dukwa onye byaru l’annah Abusalomu. Unu mekebe egwegwa g’anyi tugua; a nonyanu o mee egwegwa gbabuta anyi bya emeru ejo- iphe kpua anyi; mbu gude ogu-echi gbugbushia ndu mkpukpu-a.”

¹⁵Ndu ozì eze tuko sù iya: “Oo iphe, gube nnajiuphu anyi, bu eze turu eka l’oò iphe, ee-me be anyibe ndu-ozì ngu e-mekotaepho.” ¹⁶Oo ya bu; eze tugua; ndibe iya l’ophu tsoru iya. Eze bya ahaa umadzu iri, bu unwanyi, ndu ophu abu-zidu unyomu iya g’ephe letaru iya enya l’unuphu.

¹⁷Oo ya bu; eze tugua; waa ndu yee ya swikota; ephe jekpoeppo jerwua eka du enya; teme ephe bebe doshia. ¹⁸Ndu ozì iya bya awughakota iya; mbu ndu Kereti; me ndu Peleti; me unu nemadzu l’ukporo iri ono, shi le mkpukpu Gatu tsoru iya pho. Ephe ghata eze; vuta uzo. ¹⁹Tobudu

iya bụ; eze bya asụ Itayi, bụ onye Gatu: “?Bụ ụnu meru g'o gude i tsoru anyi? Laphukwa azụ lapfu eze, bụ Abusalomu; kele i bụ onye ọhozo; ẹme i bụru onye akpuru lẹ ndzụ l'ibe unu. ²⁰?Denu g'ee-shi l'ọo-buru gube onye byaru ụnyaphu bẹ bụwaa ntanu-a mu abya emee g'i tsoru anyi ghapheaha aghaphe l'ẹbe abụ lẹ mu maru ẹka mu eje ala. Chita ndibe unu laphu azụ. Gẹ Chipfu phukwaaru ngu obu-imemini; goshi ngu l'ọ bụ onye apfushije ike l'iphe, o pfuru.”

²¹Noo ya; Itayi yeeru eze ọnu; sụ iya: “Eshinu Chipfu nọ ndzụ g'ọ nọ iya-a; ẹme gube nnajiuphu mu, bụ eze nọdu ndzụ g'i nọ iya-a; bẹ bụkwa ẹka gube nnajiuphu mu, bụ eze nọ bẹ mube nwozi ngu a-nọdu; mẹ lẹ ndzụ; mẹ l'ọnwu.”

²²Dévidi sụ Itayi: “Ngwa; ghata vuru ụzo g'anyi je!” Ọo ya bụ; Itayi, bụ onye Gatu bya aghata; mẹ ndu yee ya swi; waa ụnwegirima, tso iya nụ. ²³Noo ya; ụzu-ekwa nọdu atụ wọwoowoo l'alị ono l'ophu gẹ ndu ono tukuror awughagbaa. Eze waa ndu ono, yee ya swi ono je adaghaa nggele Kidironu; kwaseru chebe ụzo echiegu.

²⁴Abyiyata bya aghata; Zadoku ghatakwapo; mẹ ndu Lívayi l'ophu, bụ ndu pa okpoko oghandzu Chileke. Ephe bya apazeta okpoko Chileke ono dobe l'alị jeye teke ndu ono tukuror wufutakota lẹ mkpukpu ono. ²⁵Eze sụ Zadoku: “Paphu okpoko Chileke ono azụ l'ime mkpukpu ono. Ọ -buru lẹ mu dū Chipfu l'obu bẹ oo-duphuta mu-a azụ; mee gẹ mu humabaa okpoko Chileke ono ọzo; waa ẹka ono, ọonoduje ono. ²⁶Teke ọ bụ l'ẹhu ta tsodu Chileke ụtso l'opfu ẹhu mu; wanaa mu-a baa; g'o mekwaa mu g'ọ dū iya ree.” ²⁷Eze pfukwaarupho Zadoku, bụ onye uke Chileke ono sụ iya: “?Tii bunaa onye aphuje ophuleny? Laphushia azụ l'ime mkpukpu ono l'ẹhu-guu; unu lẹ nwa ngu, bụ Ahimaazu; waa Jionatanu, bụ nwa Abyiyata. ²⁸Mu a-nọdu kwabẹ l'okpa enyimu Jiordanu l'ibe iya ophu eerwuje iya erwurwu l'ụzo echiegu jasụ unu ezia ozi g'e zia mu.” ²⁹Ọo ya bụ; Zadoku yee Abyiyata pata okpoko Chileke ono laphushia azụ lẹ Jierusalemu je anọ-kirishia l'ẹka ono.

³⁰Dévidi tughua kwaseru ara ekwa enyikota eli úbvú olivu. O kpuchia iphe l'ishi gbaru okpa ọto eje. Ndu ephe l'iya swi g'ephe ha tuko kpuchishikota iphe l'ishi awu etso iya; bya ara ekwa g'ephe ejekpoephe ono.

³¹A bya epfuaru Dévidi sụ iya: “Ahitofelu bẹ tsokwa Abusalomu achị ejo idzu ono.” Ọo ya bụ; Dévidi pfuru nụ Chileke sụ: “Jiko Chipfu; menaa gẹ mgbazi ono, Ahitofelu agbazi ono bụru iphe-mmanu.”

³²Dévidi nyirwuepho mkpakponu úbvú ono, bụ ẹka aanoduje abaru Chileke ẹja; ọ bya amaru Hushayi, bụ onye Akụ gbawa iya ndzuta. Uwe Hushayi gbajashihucha agbajashihu; ẹme o kporu ntụ kpua l'ishi. ³³Dévidi sụ iya: “I -tsowaru mu bẹ ii-bukwaru ivu-erwa duru mu. ³⁴Ọ -buru l'i laphuru azụ lẹ Jierusalemu je asụ Abusalomu: ‘Mu a-buru nwozi ngu gube eze; mbụ ẹgube ono, mu shi bụru nwozi nna ngu Dévidi pho. Nta-a bẹ

mu a-bùru nwozi ngu.' I -mee nno; bẹ ii-yetarù mu ẹka gbanwe ẹjo idzu ono, Ahitofelù achi ono. ³⁵Zadọku yẹle Abyiyata, bụ ndu-uke Chileke bẹ unu l'ẹphe a-tùkona-a nọdu l'ẹka ono. Iphemiphe, ị nùmakporu l'ibe eze; pfujeru phẹ iya. ³⁶Ụnwu phẹ ephenebo; mbụ Ahimaazu nwa Zadọku; waa Jionatanu nwa Abyiyata bẹ ephe l'ẹphe tükoru nọdu l'ẹka ono. Iphe, bụ-kpoo iphe, Ị nùmaru zia phẹ g'ẹphe bya epfuaru mu iya."

³⁷Oo ya bụ; erwurwu, ọnyà Dévidi, bu Hushayi erwu Jierúsalemù; Abusalomu nọdu abatakpọepho abata l'ime mkpukpu ono.

Dévidi yẹle Ziba

16 ¹Tọbudu iya bụ; Dévidi jeribeerupho nwanshii lẹ mkpakpọnu úbvú ono; ọ bya l'amaru; ọ hụma nwozi Mefibosheti, bụ Ziba g'ọ nọwa kwaberu iya g'ọ gba iya ndzuta. Ọ chiru nkafu-igara olemole, e dozichaaruru ree bya ebo iya ishi buredi ukporo iri; waa ẹcha-mbekee ukporo ise, e gude akpuru vayinu ghee; waa akpuru oshi-omi ukporo ise; waa otumu mee lanu. ²Eze bya aja Ziba sụ iya: "Bụ kẹ gunu bẹ i vutaru iphe ọwa-a?"

Ziba sụ iya: "Nkafu-igara ono bụ iphe, ndibe eze a-nọ-kojeru agbaphe. Ophu bụ buredi; yee akpuru oshi-omi pho bẹ bụ iphe, unwoke, tso ngu nù a-nọduje ata. Mee pho bụ ndu ike bvuru l'echiegu bẹ a-ngutaje iya gude rokota ike."

³Eze jia ya sụ: "Denu nwanwa nnajiuphu ngu?"

Ziba sụ iya: "Ọ nokwa lẹ Jierúsalemù; epfuje sụ lẹ ntanu-a bẹ ndu Ízu-relu e-woru ali-eze nna iya oche nu-phu iya azu."

⁴Oo ya bụ; eze sụ Ziba: "Iphemiphe, shi buru iphe Mefibosheti bẹ bụ-waa nkengu nta."

Ziba sụ iya: "Mu wozeru onwomu ali ephozeru ngu; jiko ge mu tubaje-kwa ngu lenya gube nnajiuphu mu, bụ eze."

Shimeyi ephu Dévidi iphu

⁵O be teke eze, bụ Dévidi erwu mkpukpu Bahurimu; a bya l'amaru nwoke lanu, yee Solu shi lenya-unuphu lanu shiwaa l'ẹka ono futa. Epha iya bụ Shimeyi; nwa Gera. Ọ nọdu ephushi iphu eje abya. ⁶O tuahaa Dévidi; yele ndu-ozu iya g'ẹphe ha mkpuma; l'ẹka ndu yee ya swi me ndu ojogu iya nokakwaru iya ro lekutara me lekicha. ⁷Shimeyi nọdu ephu iphu ono asuje: "Tugbua! Tugbua; gube ogbu-ochi ono; gube onye ẹjo-iphe ono! ⁸Chipfu gwatawaru ngu ugwo ochi ndu i gbushiru lonulo Solu; mbu onye ono, ị nọ l'aba-eze, o shi nọdu ono. Chipfu nafuwaru ngu ali-eze ono woru nu nwa ngu, bụ Abusalomu. Humanu l'ejo-ememe, iime gudeshiwaru ngu; kele ị bụ o-gbu-ochi!"

⁹Oo ya bụ; Abishayi; nwa Zeruya sụ eze: "Denu g'o gude odzu nkuta-a nọdu ephu gube nnajiuphu mu, bụ eze iphu? Jiko hanaa mu ge mu je egbubufu iya ishi."

¹⁰Eze sù iya: “?Bù gùnu bè mu l'unu jigba; unubè unwu Zeruya? O -bùru l'òo Chipfu ziru iya g'ò phu mu iphu òbu; ?bù onye a-dù ike jja ya sù: ‘?Bù gùnu kparù iphe, iime nno?’” ¹¹No iya; Dévidi bya epfuaru Abishayi yèle ndu-ozì iya g'èphe ha sù: “Unu lewarò l'òo nwa mu, shi mu l'èpho bè achò ishi ndzù mu. ?Bù-chia onye òwana, bù onye Benjiaminu-a bè ta a-kabada-rò njo? Unu parù iya haa g'ò phu mu iphu òbu; kèlè òo Chipfu ziru iya ya. ¹²O nweru-a g'òo-dù; Chipfu elee enya hùma egube èjo-iphe, dapfutaru mu nù; l'oo-meeru mu iphe-oma gude pfua mu ugwo iphu-a, eephushi mu ntan-a.” ¹³Noo ya; Dévidi yèle ndu nkiya ono kwasekpoerupho gbororo ọ̀zo ono; Shimeyi kwaseru aguga úbvú, nò chebe iphu l'ibiya òphu Dévidi nò. O òdù eje bya ephushi iya iphu; atù iya mkpuma; bya aphuru iya ntù. ¹⁴Eze yèle ndu ono, yèe ya tũko swĩru ono bya e-jerwu èka èphe eje; ike bvùshi-kotawa phè; èphe jerwua bya anòdu l'èka ono ròkota ike.

Ahitofèlù ezi Abusalomu èjo-nzi

¹⁵Tòbudu iya bù; Abusalomu yèle ndu ono l'òphu; mbù unwoke Ízùrèlù wùru zebata lè Jierúsalemù. Ahitofèlù tsokwaru phè phò. ¹⁶Oo ya bù; Hushayi, bù onye Akù, bù ònyà Dévidi jepfu Abusalomu je asù iya: “Nòdukwa ndzù ogologo; gùbe eze! Gùbe eze! Nòdukwa ndzù ogologo!”

¹⁷Abusalomu bya asù Hushayi: “?Bù n-yemobu, i yeru ònyà ngu òbu-a baa? ?Bù gùnu meru g'ò gude òphu unu l'ònyà ngu ta aswìdu?”

¹⁸Hushayi sù Abusalomu: “Waawaa; kèlè òo onye òphu Chipfu; mè ndu-a; waa ndu Ízùrèlù l'òphu hòtaru bè mu a-bùru nkiya. O bùru iya bè mu l'iya a-nòduwara ya. ¹⁹Tèmanu; ?bù onye bè ò gbaru gè mu jeru ozi; bù nna tòo nwa? Oo nwa bè mu e-jeru ozi. Oo egube mu shi ejeru nna ngu ozi bù gè mu e-jekwarupho gùbedua ozi.”

²⁰Abusalomu bya asù Ahitofèlù: “Chì-koshikwa mu idzu iphe, anyi e-me.”

²¹Ahitofèlù pfunaaru Abusalomu sù iya: “Je ejepfukòta unwanyi ono, ndu òphu abù-zidu unyomu nna ngu ono; mbù g'unu l'èphe kwa akwa-kwa nwoke yèle nwanyì; mbù unwanyi ono, ò harù g'èphe leta ibe eze enya ono. Oo teke ono bè ndu Ízùrèlù l'òphu a-nùma l'i mewaru onwongu ì òdù eshiwaa nna ngu tũkuruba; tème obu akabakwaphò eshihu ndu ono, etso ngu nù ono ike.” ²²Oo ya bù; a bya akpòberu Abusalomu ọ̀lò-èkwa l'eli mkpotsu-ọ̀lò ibe eze; Abusalomu jepfu unwanyi ono, abù-zidu unyomu nna iya ono l'èka ndu Ízùrèlù l'òphu ele iya enya.

²³Teke ono bè mgbazi Ahitofèlù shi adùjeepho g'egube, eejeje l'ajì l'èka Chipfu-a. O bùru egube ono bè Dévidi yèle Abusalomu shi ewotaje mgbazi Ahitofèlù.

Hushayi ezi Abusalomu èjo-nzi

17 ¹Ahitofèlù bya ekua Abusalomu sù iya: “Haa gè mu hòta unu unwoke ọ̀kporo l'iri g'anyi tũgbua je achia Dévidi ọ̀so l'enyashi-a.

²Mu a-bapfu iya teke ike bvùshiwaru iya; ọ dūwaa gologolo. Mu emee gẹ ndzū-agūgu rwuta iya gẹ ndu ono, yẹe ya swì l'ophu ono gbakashìhu. Mu agbẹ teke ono woru eze gbugbua nwẹkinyi iya. ³Mu e-duphutakọta-ru ngu ndu ono azū. Onye ono, ìicho -nwùhuwaa bẹ ndu ọphuu g'ẹphe ha lwakotawaru azū. Ndu ono g'ẹphe ha bẹ ta adudu mẹ onye lanu, a byaru e-merwu ẹhu.” ⁴Iphe ono tuko du Abusalomu yẹe ndu bu ogerenya ndu Ízurelu l'ophu ree.

⁵Abusalomu bya asu: “Unu kufua Hushayi, bu onye Aku g'anyi nūma-fua iphe, oo-pfu.” ⁶Hushayi byapfuta ẹ ya pho; Abusalomu su iya: “Wakwa iphe Ahitofelu pfuru baa. ?Bu g'anyi mee iphe, o pfuru? Teke odumeka yekwaa onu nkengu.”

⁷Oo ya bu; Hushayi bya asu Abusalomu: “Idzu, Ahitofelu chi-koshiru ngu k'ogiya-a ta adukwa ree. ⁸I mahawaru gẹ nna ngu gbaru; mẹ ndu nkiya. Epehe bukota ndu ike du l'ogu; emebe ehuka g'agu, a chitaru unwu iya. A -gufukpooro ono bẹ nna ngu bu onye k'ogu doru enya; yele ndu ophuu ta abyadu aze l'eka lanu lenyashi-a. ⁹Lenu; nta-a bẹ o domiwaru onwiya l'ime ogba ozoo l'eka ozo. O -buru l'o futaru bya etsoo unu ogu nta-a; ndu ojogu ngu haru nwuhu; bẹ onye numakporu iya nu a-sukwa: 'E gbushiakwaru nemadzu shii l'echilabo ndu etso Abusalomu.' ¹⁰Je akpachaa le ndu ike du l'ogu; mbu ndu ono, obu shihuchaaru ike g'oduma ono bẹ ndzu-agugu e-rwutachakwaa; noo kele ndu Ízurelu l'ophu bẹ maru le nna ngu bẹ bu onye ike du l'ogu; teme ndu yẹe ya swì bu-chaaru ndu okpehu du. ¹¹Su-a; iphe, bu idzu nkemu bu gẹ ndu Ízurelu l'ophu dzuko-be byapfuta ngu; e shikpo le Danu jasule Biye-Sheba; mbu g'ẹphe zahule g'ẹja, no laguga eze-enyimu; gubedua l'onwongu e-duru phe jeshia ogu obu. ¹²Oo ya bu; anyi etsoo ya ogu l'eka anyi cho-vukpoeru iya pho. Anyi adapyabe iya egube ono, iji utsu anoduje adashi l'ali-a. Yebedua l'onwiya waa ndu yẹe ya swì l'ophu bẹ ta adudu onye ophu e-dobe ndzu m'onye lanu. ¹³O -buru l'o nweru mkpukpu, o pyobaru; ndu Ízurelu l'ophu e-gude eri bya le mkpukpu ono; bya eworu iya lo-tsua; loo ya wuruwuru nwuru ye le nsuda; k'ophu bu la ta abyadu a-huma m'ibiribe eja lanu l'eka ono.”

¹⁴Abusalomu mẹ ndu Ízurelu l'ophu tuko zua su: “Idzu ke Hushayi, onye Aku bẹ kakwa ke Ahitofelu ree.” Iphe, kparu iya nu bu le Chipfu chi-buwaru gẹ ya shi nno kpakashia okpobe idzu ono, Ahitofelu chi-koshiru ono; k'ophu Chipfu e-shi nno mee g'ejo-iphe dapfuta Abusalomu.

Ama gbaru Dévidi; o gbalaa

¹⁵Toṣudu iya bu; Hushayi bya akaru Zadoku yẹe Abyiyata, bu ndu-uke Chileke idzu ono, Ahitofelu chi-koshiru Abusalomu yele ndu bu ogerenya ndu Ízurelu ono; waa ophu yebedua l'onwiya chi-koshiru phe. ¹⁶Su: “Unu mee egwegwa zia ozi g'e zia Dévidi su iya g'o to kwakwa akwakwa l'eka eerwuje enyimu Jiṣdanu erwurwu l'echiegu ono. G'o to dukwa iphe, e-me

g'ò tọ dafu azu iya ophuu; o -dudu be aa-tukokwa yebedua bu eze waa ndu yee ya swi kpo g'eekepoje ntụ-a.”

¹⁷Teke ono be Jionatanu yele Ahimaazu anoduje le Enu-Rogelu; kele ephe ta tudu ama abahu le mkpukpu Jierusalemu. O buru nwata nwa-mgboko, eje ozi be eezije g'o je ezia phe ozi; ephe eje ezia ya eze, bu Dévidi. ¹⁸Ole o nweru nwokorobya lanu humaru phe nu; o je edooru iya Abusalomu. Ephenebo meepho egwegwa lufu l'eka ono tugbua jeshia ibe nwoke, bu le mkpukpu Bahurimu. Nwoke ono nweru welu l'oma-unuphu ibe iya. Ephe nyiba l'ime welu ono. ¹⁹Nyee nwoke ono chita iphe kpuchite onu welu ono; bya eworu akpuru mebyi iphe susaa l'eli iya. Ophu o to dudu onye maru nu. ²⁰Ndu ozi Abusalomu byapfutaepho nwanyi ono l'ulo; ephe jia ya su: “?Bu aweya be Ahimaazu yee Jionatanu no?”

Nwanyi ono su phe l'ephe daakwaru azu nggele pho tugbua.

Ephe choo phe; ophu ephe ahumaduru phe; ephe laphushia azu le Jierusalemu. ²¹Ndu ono lashichaepho; Ahimaazu yee Jionatanu shi le welu ono nyifuta tugbua jeshia ezi eze, bu Dévidi ozi ono. Ephe rwua bya akooru iya egube idzu, Ahitofelu chiru; bya asu iya g'o tugbuekwapho nta-a dafu azu enyimu azu iya ophuu. ²²Noo ya; Dévidi yee ndu yee ya swi tugbua je adaa enyimu Jiordanu. Nchi bohushia; ophu o nweedu onye ophu phoduru nu; ephe dafukotawa azu enyimu Jiordanu.

²³Ahitofelu humaepho lo to budu idzu nkiya be e tsoru; o nyikota eli nkafu-igara iya gbagbua; o buru iya ala ibe iya le mkpukpu, o shi. O larwua bya edozichaa ibe iya g'oo-du; o je aswi-gbua onwiya. Oo ya bu; o nwuhu; e lia ya l'ilu nna iya.

²⁴Dévidi tugbua jeshia mkpukpu Mahanayimu; Abusalomu yee unwoke ndu Izurelu l'ophu, ephe l'iya swi, daa enyimu Jiordanu kwaseru. ²⁵Abusalomu woru Amasa mee onye-ishi ndu ojogu iya l'ozo Jiowabu. Amasa be bu nwatibe onye Izurelu, ephe iya bu Itura. Itura ono be luru Abigelu, nwada Nahashi bya aburu nwune Zeruya, bu ne Jiowabu. ²⁶Abusalomu yee ndu Izurelu je adoru l'alì Giladu.

²⁷Dévidi byarwutaepho Mahanayimu; Shobi nwa Nahashi ke mkpukpu Raba, du l'alì ndu Amonu; me Makiya nwa Amiyelu ke mkpukpu Lodeba; me Bazilayi, bu onye Giladu, shi le mkpukpu Rogelimu; ²⁸vukoo iphe vutaru Dévidi yee ndu yee ya swi g'ephe rije. Iphe, o bu buru iphe-azee; me eze gbamugbamu; me iphe, a kpushiru leja; me witi; me bali; me ereshi, e gweru egwegwe; me ophu a huru ahuhu; me azamu; me okpa; ²⁹me manu-enwu; me mini era-eswi, toru atoto; me aturu; me mini era-eswi, hukoru ahuko. Noo kele ephe suru le Dévidi phe be egu aguwa; ike bvushiwa phe; teme egu mini nodu agukwa phe pho lechiegu.

Anwuhu Abusalomu

18 ¹Tobudu iya bu; Dévidi bya akpakoo ndu yee ya swi; bya ahota ndu-ishi ojogu ke ndu ophu du unu labo lukporo iri iri; bya ahota

ndu-ishi ojogu ke ndu ophu du ukporo ise ise. ²Dévidi bya eye ndu ojogu ono g'èphe tugbua. Nkereto le ndu ojogu ono be bu Jiowabu bu onye-ishi phe; nkereto ozo buru Abishayi; nwa Zeruya; mbu nwune Jiowabu, bu onye-ishi phe; nkereto ozo buru Itayi onye Gatu be bu onye-ishi phe. Eze su ndu ono: “Mbedua l'onwomu a-futakwapho bya etsoru unu jeshia.”

³Obenu le ndu ono suru iya: “O to dukwa iphe bya eme gi tsoru anyi je; kele o -buru l'anyi yeru okpa l'oso be ephe ta akpadu anyi ishi. O -buru le nkeru-ebo l'ime anyi nwushihuru be ephe ta abyadu akpa anyi ishi. Gubedua l'onwongu ha g'anyibedua ukporo unu nemadzu l'unu ise. Su-a; iphe, kachia ree bu gi noduchia le mkpukpu; gbè l'eka ono buchiaru agbarike anyi.”

⁴Eze su phe: “Oo iphe, unu rikpoerupho l'ọ kaa ree be mu e-me.” Oo ya bu; eze bya apfucha l'aguga onu-abata mkpukpu ono; ndu ono nodu awughatagbaa; ndu ophu adu ukporo ise ise; ndu ophu adu unu labo l'ukporo iri iri. ⁵Eze nmaru okwa nu Jiowabu; me Abishayi; me Itayi su: “Unu gudekwaro iswi ehú mbedua haa eme nwokoro bya ono, bu Abusalomu iphe kpranganga-a.” Ndu ono l'ophu numakota g'eze nmaru okwa ehú Abusalomu yechaa ndu-ishi ndu ojogu ono l'eka.

⁶Oo ya bu; ndu ono wuru jeshia l'oma egu je etsoo ndu Izurelu ogo. O buru l'oswa Ifuremu be ephe no lwua ogo ono. ⁷Ndu ke Dévidi nodu l'eka ono lwu-kpee ndu ojogu ndu Izurelu. Ndu e gburu egbugbu mboku ono paa eka apaa. Ephe du ukporo unu nemadzu ugbo labo l'unu iri. ⁸Ogo ono swokobe dzuru ali ono l'ophu. Ndu nwuhuru nu l'ime oswa mboku ono ka ndu ophu e gude ogo-echi gbushia.

⁹A nodu alwu ogo ono; Abusalomu ye le ndu ojogu Dévidi dzugba-be. Teke ono be Abusalomu agba inya-mulu iya; inya-mulu ono gbaba le mkpula eze achi. Ekali achi ono kota Abusalomu l'ishi; o kwaa iphe l'echi; kúahaa eregede l'ekali achi. Inya-mulu ono, o shi agba ono gbakwaseru tugbua. ¹⁰Nwoke lanu huma iya; je edooru iya Jiowabu su: “Lenu; mu humakwaru Abusalomu g'o kwakoru aku eregede l'achi.”

¹¹Jiowabu jia nwoke ono, pfuru iya iphe ono su: “?I suru l'oo gunu? ?I humaru iya lenya too? ?Bu gunu meru g'o gude ophu i ti chitaduru iya tua l'ali l'eka ono. Mu gege anue ngu pho shekelu mkpola-ochaa iri; waa akpo, eekebutaje l'upfu.”

¹²Nwoke ono su Jiowabu: “Obetakpo e jee aparu shekelu mkpola-ochaa, du unu labo l'ukporo iri dee mu l'eka; mu tege ahalikwa eka k'egbutsu nwatibe eze; l'eka anyi numakwaru-a okwa, eze nmaru ye unu le Abishayi; me Itayi l'eka su: ‘G'unu gudekwa ke yebe eze gbobuta nwo-koro bya ono, bu Abusalomu.’ ¹³Su-a; o -bu le mu jeru etsebe ndzu mu l'onu eta; woru Abusalomu gbua; g'o to nwedu iphe, eedomiru eze edomi-a; me unu apfuribecharu je apfuru paru mu buhaa.”

e 18:7 Bu iya bu 20,000, le mbekee.

¹⁴Tòbodu iya bụ; Jiowabu sụ: “Mu taa kwabẹkotaduru ngu egube ono.” O chĩa arwa ẹto je anmaa Abusalomu l'obu; lẹ gẹ Abusalomu nọkwadu ndzụ l'eli achị ono. ¹⁵Ụnwokorobya iri, bụ ndu achijeru Jiowabu ngwoḡu nọ-ḡhee Abusalomu mgburugburu woru iya gbugbua; ọ nwụhu.

¹⁶Noo ya; Jiowabu bya egbua opu gude sephuta ndu oḡoḡu ono azụ. Oo ya bụ; ẹphe haa achị ndu Ízurelù ọso. ¹⁷Ephe bya apata odzu Abusalomu chie l'eze iduma, nọ l'ọswa l'ẹka ono; kwaa ikpo mkpuma kùbe iya l'eli. Ndu Ízurelù gbẹ teke ono tũko tsukahụ; onyenonu lashĩa ibe iya.

¹⁸Teke Abusalomu nọ ndzụ bẹ ọ pataru òbvúrú je ebvube lẹ Nsuda Eze g'ọ bụru iphe, ee-gudeje nyata iya; kele ọ rĩru sụ: “Mu te enwedu nwa nwoke, ee-gudeje nyata ẹpha mu.” O woru ẹpha nkiya gube òbvúrú ono. A nọdu anọduje eku iya iphe, e gude anyata Abusalomu byasụ ntanụ-a.

Eepfuru Dévidi k'anwụhu Abusalomu

¹⁹No iya; Ahimaazu nwa Zadọku sụ: “Gẹ mu bya agbagbua je ezia eze lẹ Chipfu bẹ nafutawaru iya l'ẹka ndu ohogu iya.”

²⁰Jiowabu sụ iya: “O tọ bụdu gubedua bẹ ọ gbaru g'i jeshia ezi ozi ntanụ-a. O -rwua mbọku ọzo; l'i jewarọ ezia ya ozi. O -bụru kẹ ntanụ-a bẹ ọ tọ gbaduru g'i je ezia ya ozi; noo kele nwatibe eze bẹ nwuhuru nu.” ²¹Oo ya bụ; Jiowabu pfiaru nwoke, shi l'alì Kushi sụ iya: “Tugbua je akọoru eze iphe, ì humaru.” Onye Kushi ono phozeru Jiowabu iphu l'alì; bya agbagbua; ọ bụru iya ejeje.

²²Ahimaazu nwa Zadọku bya epfukwaaru Jiowabu ọzo; sụ iya: “Haaro gẹ mu gbatsoru onye Kushi ono azụ l'azụ; obetakpọo ḡnu je e-me.”

Jiowabu sụ iya: “Nwa mu; ?bụ ḡnu meru g'ọ gude ọ dụ ngu g'i je? O to nwedu obunggo, ee-bu ngu l'ozì ono.”

²³O sụ iya: “Obetakpọo ḡnu je e-mee bẹ mu jefutaje.”

Oo ya bụ; Jiowabu sụ iya: “Gbagbunaa!” Oo ya bụ; Ahimaazu gbagbua shĩa ụzo nsuda ẹnyimu Jiódanu shi nno gbaghata onye Kushi phọ.

²⁴Teke ono bẹ Dévidi nọ lẹ mgbaka echilabọ ọnu-abata ime mkpukpu ono; waa ọphu nọ mẹ a -nọdu alufu alufu. Onye-nche nyihu eli igbulọ ono, e gude kpua ọnu-abata ono je apfuru l'eli iya. Onye-nche ono jeshia ele ẹnya; ọ hụma nwoke, agbakpọepho ọso nwẹkinyi iya. ²⁵Onye-nche ono kua eze oku; pfiaru iya ya. Eze sụ: “O -bụru l'ọ swì nkinyi iya; bẹ bụ ozi, dụ ree bẹ ọobyazizi.” Nwoke ono nọdu agbakpọepho abya ntse ntse.

²⁶Oo ya bụ; onye-nche ono tufu ẹnya hụma nwoke ọzo, agbakwapho ọso abya. O kua onye-nche ọnu-abata mkpukpu sụ: “Lenu; onye ọzo agbakwa ọso nwẹkinyi iya abya!”

Eze sụ: “Oo ozi, dụ ree bẹ ọobyakwapho ezizi.”

²⁷Onye-nche ono sụ: “Onye kẹ mbụ phọ bẹ ọso iya gbẹ dụ mu g'ọ bụ kẹ Ahimaazu nwa Zadọku.”

Eze sụ: “Oo ọkpobe nemadzụ bẹ ọbu; ọ bụru ozi, dụ ree bẹ ọobyazizi ezizi.”

²⁸Noo ya; Ahimaazu gbarwuta bya ekua eze sù iya: “Iphemiphe dù-kotaekwapho ree-o!” O phozeta buaru eze iphu l'alì sù: “G'ajaja buru kẹ Chipfu, bù Chileke ngu! O wofuwarù ndu ono, haliru ẹka g'ẹphe gbua gù-be nnajiùphu mu, bù eze.”

²⁹Eze jìà ya sù: “?To nwedùnu iphe, meru nwokorọbya ono, bù Abùsalomu?”

Ahimaazu sù iya: “Mu hùmaru g'aatu ejo ọzu lẹ teke ono, Jiowabu eme g'o zia mùbe nwozi gùbe eze ozi-a. Ọle mu ta amakwanù ishi ọzu ono, aatu ono.”

³⁰Eze sù iya: “Ghakọbe pfulu l'ẹka-a.” Ọo ya bù; ọ bya aghachi pfulu l'ẹka ono.

³¹Ọo ya bù; onye Kushi ono byarwuta bya asù: “Gùbe nnajiùphu mu, bù eze; nùmakwa ozi ẹhu-ùtso! Lẹ ntanù-a bẹ Chipfu nafùtakotawaru ngu l'ẹka ndu wulihuru etso ngu opfu.”

³²Ọo ya bù; eze jìà onye Kushi ono sù iya: “?To nwedùnu iphe, meru nwokorọbya ono, bù Abùsalomu?”

Onye Kushi ono sù iya: “G'iphe, bukpoò ndu ọhogu nnajiùphu mu, bù eze; mekpoo iphe, bù ndu wulihuru etso ngu opfu dukotaekwapho gẹ nwokorọbya ono.”

³³Iphe ono rwua eze l'ẹhu shii; ọ nyigobe jeshia l'ulo ọphu a kpuru l'eli ọnu-abata mkpukpu je anọdu raahaa ẹkwa. Ọ nọdu eje bya arajẹ sù: “Gùbe nwa mu Abùsalomu; nwa mu-ee; nwa mu Abùsalomu! Ọ -bù l'ọo mbẹdua nwùhuru; gùbedua nọduroya. Gùbe nwa mu Abùsalomu; nwa mu-ee; nwa mu-ee!”

Jiowabu abarù Dévidi mba

19 ¹Tọbudu iya bù; e je edooru Jiowabu sù iya: “Eze bẹ agùkwa aphù; bya ara ẹkwa Abùsalomu.” ²Alwù-kpe ono, ndu ojogu lwù-kperu mbọku ono bya aghaa igharaphu buru ndu ojogu ono g'ẹphe haa iphe aphù; noo kẹle ẹphe nùmaru g'aasùje l'eze bẹ akwakwa ẹkwa nwa iya ono nwùhuru nù ono. ³Ẹphe tọ nwẹhu zitachaa onwophẹ ezita pyoba l'ime mkpukpu mbọku ono; g'ẹgube ono, ndu iphere dù l'ẹphe gbaru ọso l'ogu ezitajẹ onwophẹ ezita pyobata ono-a. ⁴Eze kpuchia onwiya iphe l'iphu chia mkpu ẹkwa sù: “Gùbe nwa mu Abùsalomu! Oowa-e Abùsalomu nwa mu; nwa mu-ee!”

⁵Noo ya; Jiowabu bya ejepfu eze l'ime ọlo je asù iya: “Nta-a bù ndu nkengu, dzọru ngu ndzù; dzọo unwu ngu; mẹ unyomu ngu; mẹ unwanyì, abù-zidu unyomu ngu-a bẹ ì tukurù meru iphe-iphere kpua ntanù-a; ⁶Ọ buru ndu ì dù ashì bẹ ì yeru obu; kpọ-chia ndu yeru ngu obu ashì. Umere ngu ntanù-a mewaru o doo ẹnya l'ọ tọ dùdu iphe, ì gùberu ndu-ishi ndu ojogu ngu; waa ndu-ozì ngu phẹ. Mu hùmawaru l'ẹhu gege agbẹ atso ngu uto ọme ọ -bù lẹ Abùsalomu nọ ndzù ntanù-a; anyìbedua tuko g'anyi ha

nwùshihukota. ⁷Ngwa; tǔgbukwaa jepfu ndu-ozì ngu je eyeru phẹ njima. Mu gudekwa ẹpha Chipfu eriburu ngu angù; l'ọ -bùru l'ì tì gbẹshiduru je; bẹ anyi a-wùfu-gbukwa gbado ngu; o to nwedù mẹ onye lanù ìhumakwa-du lẹ mgboru ngu l'enyashi-a. Ọ bùru ono a-bya akakọta ngu atsu l'ẹhu eme l'ẹjo-iphe, shikpọ teke ì bụ nwokorọbya nwùtaru ngu byasù ntanù-a.” ⁸Ọo ya bụ; eze bya agbẹshi pata oshi iya je anọdu l'ọnu ẹka eeshije abahù lẹ mkpukpu ono. A bya akọoru ndu ono sù phẹ: “Unu lenu; eze nọkwa l'ọnu ẹka eeshije abata lẹ mkpukpu-a.” Ndu ono tǔko g'ẹphe ha wù-pfuta iya.

Dévidi alaphu azù lẹ Jierúsalemù

Teke ono bẹ ndu Ízurelu gbakashihuaru; onyenonu lashichawa ibe iya. ⁹Ndu Ízurelu g'ẹphe ha swọaha uswo l'ipfu nonu; ndu nonu ẹphe epfugbaa; asuje: “Ọo eze bẹ nafutaru anyi l'ẹka ndu ọhogu anyi; bya adzọta anyi l'ẹka ndu Filisitayinu. Obenu lẹ nta-a bẹ ọ gbafuru l'alì-a; ọ bùru opfu ẹhu Abusalomu bẹ o gude gbafu ọbu. ¹⁰Abusalomu-a, bụ onye ono, anyi wuru manù l'ishi g'ọ bùru eze anyi ono-a byawanu anwuhu l'ogu. Sù-a; ?bù gunu meru g'ọ gude ọphu e te yedu onu g'ee-shi g'e du-phuta eze azù?”

¹¹Eze, bụ Dévidi bya ezia ozi g'e zia Zadọku yẹle Abyiyata, bụ ndu-uke Chileke sù: “Unu jiedu ndu bụ ọgerenya ndu Jiuda sù phẹ: ‘?Bù gunu meru g'ọ gude ọ bùru unubedua eme g'unu kperu azù l'eme g'eze lwaphuta azù l'ibe iya; l'ẹka iphemiphe, ndu Ízurelu l'ophu epfu rwuchawaru l'ẹka mube eze nọ l'ibe mu? ¹²Unubedua bẹ bụ unwunna mu; mbù lẹ mu l'unu tukuru bùru anù-ẹhu waa mee lanù. Sù-a; ?denuhunu g'ọ gude; ọ bùru unubedua bụ ikpazù lẹ g'ee-shi mee g'eze lwaphuta azù?’ ¹³Unu asù Ama-sa lẹ mu sùru-a: ‘?Mu lẹ ngu ta abudu anù-ẹhu lanù waa mee lanù ọo? Ọo gubedua bẹ mu e-gude dochia ẹnya Jiowabu g'ì bùru ishi ndu ojogu mu shita ntanù-a kwaseru; ọ -dudu nno; gẹ Chileke gwakwa mu ọchi; mbù g'ọ mekwa mu ọphu ka njo!’ ” ¹⁴Ọo ya bụ; o pfubuta ndu Jiuda; obu bya aburu phẹ nanù. Ẹphe bya ezia sù g'e zia eze sù iya g'ẹphe lẹ ndu nki-ya tǔko lwatashia.

¹⁵Eze bya alwatashia; lwaberu ẹnyimu Jiódanu. Teke ono bẹ ndu Jiuda jewaru anọdu lẹ mkpukpu Gilugalu g'ẹphe gba iya ndzuta; g'ẹphe edughatawa iya rọ l'enyimu Jiódanu. ¹⁶Tobudu iya bụ; Shimeyi; nwa Gera, bụ onye Benjiaminu kẹ mkpukpu Bahurimu mekebeephọ ẹgwegwa tsoru ndu Jiuda; ẹphe jeshia agba eze, bụ Dévidi ndzuta. ¹⁷Ndu ipfu Benjiaminu, ẹphe l'iya swì bẹ dù unu labọ l'ukporo iri; waa onye-ozì onu-ulo Sọlu, bụ Ziba; yẹle unwu iya unwoke, dù iri l'ise; waa ndu-ozì iya umadzu ukporo. Ẹphe mee ẹgwegwa je agba eze ndzuta l'onenyimu Jiódanu l'ẹka ọ nọ. ¹⁸Ẹphe rwughata ẹnyimu Jiódanu g'ẹphe kughata ndibe eze; tẹme waa g'ẹphe meeru eze iphe, ọ dù iya g'e meeru iya.

Dévidi aguru Shimeyi nvu

O be gę Shimeyi; nwa Gera daerupho ęnyimu Jiđdanu; ọ daa kpurumu l'atatiphu eze; ¹⁹sụ iya: “Pakwaru haa; jiko nnajiuphu mu l'ęka mu mesweru ngu. Te ejekwa anyata iphe, du ęji, mube nwozi ngu meru gube nnajiuphu mu, bu eze le mboku ono, i shi Jierusalemu tugbua ono. Eze; jiko wofukwa iya l'obu ngu. ²⁰Noo kele mube nwozi ngu maru-a le mu meru iphe-ęji; ọle ọ kwanu mbedua bu onye ivuzo l'onulo Jiđsefu l'ophu, byaru ntanu-a bya agba gube nnajiuphu mu, bu eze ndzuta.”

²¹Ọo ya bu; Abishayi; nwa Zeruya su: “Ọ gbaru g'e gude k'iphe-a gbua Shimeyi; noo kele ọo iphu be o phuru onye Chipfu wuru manu g'o buru eze.”

²²Dévidi su: “?Bu gunu be mu l'unu jigba; unube unwu Zeruya; meru g'o gude unu je a-buru ndu etso mu opfu le ntanu-a? ?Ọ gbaru g'o nweru onye ee-gbu egbugbu l'alị Ízurelu ntanu-a? ?Tọ le mu ta amadu l'oo mbedua bu eze ndu Ízurelu ntanu-a?” ²³Ọo ya bu; ọ sụ Shimeyi: “E tee gbudu ngu ro ya.” Eze kwee ya ukwe ribuaru iya nte.

Dévidi emeru Mefibosheti iphe-oma

²⁴Nwanwa Solu, bu Mefibosheti tugbukwapho jeshia eze ndzuta. O to nwubejeduru okpa iya ęnya; ophu ọ to kpubotajeduru ęji-agba iya akpobotota; ophu ọ sajeduru uwe iya asasa e -shi mboku ono, eze lufuru tugbua; jasụ mboku, ọ lwaphutaru azu l'ęhu-guu. ²⁵O shiepho Jierusalemu bya ge ya gba eze ndzuta; eze jia ya su: “Mefibosheti; ?bu gunu meru g'o gude ophu i ti tsoduru mu tugbua?”

²⁶Ọ su: “Gube nnajiuphu mu, bu eze; eshinu mube nwozi ngu bu ęni-ęni be mu sukwaru nwozi mu g'o doziaru mu nkafu-igara mu ge mu nodu iya gbaru tsoru gube eze; obenu le nwozi mu ono, bu Ziba ghoru mu ugho. ²⁷Teme ọ byawa bya epfutoshia mube nwozi ngu l'ęka gube nnajiuphu mu, bu eze no. Ọle gube nnajiuphu mu, bu eze be du-a g'ojosi Chileke. Iphe, dukpoe ngu pho ree; mee ya. ²⁸Iphe, shi rwube ndu onu-ulo nna mu l'ophu bu g'ephe nwushihu l'iphu nnajiuphu mu, bu eze; ọle e mecharu i woru mube Mefibosheti, bu nwozi ngu dobe ge mu yiru le ndu a-noduje eri nri le teburu nkengu gedegede. O to rwubeekwaru mu me ililekpoo ge mu rajebaaru kpua gube eze.”

²⁹Eze su iya: “?Bu opfu ęhu ngu be ii-gudewaro epfupfu? Mu suwaru ge gu le Ziba kekaha alị ono!”

³⁰Mefibosheti su eze: “Haa ge Ziba wotakotaro iphemiphe; eshinu e mecharu gube nnajiuphu mu, bu eze lwarwuta ibe ngu l'ęhu-guu.”

Dévidi emeru Bazilayi iphe-oma

³¹Bazilayi ke Giladu be shi le mkpukpu Rogelimu bya ge ya tsoru eze daa ęnyimu Jiđdanu; mbu ge ya dughata iya ęnyimu Jiđdanu. ³²Bazilayi

bẹ̀ bụwaa ogerenya shii. Ọ nọwaru ụkporo apha ẹno. Ọ bụ nwoke nwe-ru iphe shii k'ọphu bụ l'ọo ya shi anụje eze nri teke ọ nọ lẹ Mahanayimu. ³³Eze sụ Bazilayi: “Tsuru mu daa ẹnyimu-a; g'anyi je anọdu lẹ Jierúsalemu k'ọphu mu a-nọdu eleta ngu ẹnya ree.”

³⁴Bazilayi sụ eze: “?Mu a-nofua apha ole nta-a kẹ gẹ mu tsoru gube eze lashia Jierúsalemu? ³⁵Iphe, mu nọwaru nta-a bukwa ụkporo apha ẹno. ?Mu makwaduru iphe, dụ ree waa iphe, dụ ẹji? Tọ ?mu adu ike amakwaduru uto iphe, mu eri eriri; ọzoo ọphu mu angu angungu? Tọ ?mu adu ike anumakwadu olu-ebvu unwoke; ọzoo k'unwanyi? ?Bụ kẹ gunu bẹ mube nwozi ngu a-bya aburu ivu-erwa duru gube nnajiuphu mu, bụ eze? ³⁶Mube nwozi ngu bụa gẹ mu duriberu ngu nwanshii l'azu ẹnyimu Jiódanu azu iya ọphuu. ?Bụ kẹ gunu bẹ gube eze e-gude bua mu obunggo ọphu ha egube ono? ³⁷Haaro gẹ mube nwozi ngu lashia k'ọphu mu a-nọdu lẹ mkpukpu ẹka mu shi nwuhu; mbụ l'ẹka nọ-kube ilu nna mu waa kẹ ne mu ntse. Sụ-a; waa nwozi ngu, bụ Kimuhamu baa; g'o tsoru gube nnajiuphu mu, bụ eze dafu azu iya ọphuu; l'iimeeru iya iphe, dukpoe ngu pho ree.”

³⁸Eze sụ iya: “Kimuhamu bẹ e-tsuru mu-a dafu azu iya ọphuu; ọ buri iphe, dụ ngu ree bẹ mu e-meru iya. Ọzo buri l'ọo iphe, i sukpoerupho gẹ mu meeru ngu bẹ mu e-meru ngu.” ³⁹Ọo ya bụ; ndu ono l'ọphu dafukota azu ẹnyimu Jiódanu azu iya ọphuu; eze bya adafukwapho. Eze bya eworu onu tsutsua Bazilayi; goru onu-oma nụ iya. Bazilayi lashia ibe iya.

Ndu Ízurelu ekoru ndu Jiuda okophoo

⁴⁰Eze bya adaa ẹnyimu ono jeshia mkpukpu Gilugalu; Kimuhamu tso-kwaru iya pho. Ndu Jiuda l'ọphu mẹ nkeru-ẹbo ndu Ízurelu tuko tsoru edu eze. ⁴¹Noo ya; iphe, bụ ndu Ízurelu l'ọphu zahụ byapfuta eze bya asu iya: “?Denu g'o gude unwunna anyi phe, bụ ndu Jiuda bya eduta gube eze lẹ mpya; mbụ duta gụ lẹ ndibe ngu; mẹ ndu gụ l'ephẹ swi l'ọphu dafuta azu ẹnyimu Jiódanu?”

⁴²Ndu Jiuda l'ọphu tuko g'ephẹ ha yeeru ndu Ízurelu onu sụ phe: “Iphe, kparu iya nụ bẹ bụ l'anyi l'eze bẹ ka abubu. Sụ-a; ?bụ gunu meru iphe, ẹhu egu unu egu lẹ k'iphe ono? ?O nweru iphe, shi eze l'ẹka anyi riru? Tọ; ?o nweru iphe, anyi nataru g'ọ buri nkanyi?”

⁴³Ọo ya bụ; ndu kẹ Ízurelu yeeru ndu Jiuda onu; sụ phe: “Eka anyi dukwa l'ẹhu eze ugbo iri. Ọzo bukpooru nụ l'anyi kakwa iya unu enweru. ?Dahunu g'o gude; ọphu unu agubeduru anyi iphe? ?Tọ buna anyibedua vu uzo wata epfu g'ee-shi g'e duphuta eze azu?”

Ọle ndu kẹ Jiuda gbẹ kabaanu eyeru ndu Ízurelu onu ẹhuka ẹhuka.

20 ¹Tobudu iya bụ; o nweru ogalemkpa nemadzụ, nọ l'ẹka ono, ẹpha iya bụ Sheba nwa Bikiri. Ọ bụ onye ipfu Benjiaminu. O woru opu gbua chishia mkpu sụ:

“Ọ tọ dukwa òkè, anyi nweru l'ẹhu Dévidi.

Ọ tọ ẹ̀kwa okiphe, anyi nweru l'ẹ̀hu nwa Jiesi!

Unubẹ́ Ízùrẹ̀lù; g'onyenonu lashia ibe iya-o!"

²Ọo ya bụ; ndu Ízùrẹ̀lù l'ophu gbadochaa Dévidi je awu-tSORU Sheba nwa Bikiri. Ọle ndu kẹ́ Jiuda nọp̄pho nọnyabe eze shitakp̄o l'enyimu Jiódanu jasú lẹ́ Jierúsalemú.

³Dévidi bya alarwua ibe iya lẹ́ Jierúsalemú; bya achita unwanyi iri ono, abụ-zidu unyomu iya ono, ọ haru g'ẹ̀p̄he nọdu leta ibe eze ẹn̄ya ono. Ọ chiru p̄hẹ́ ye l'ulo ẹ́ka a nọ eche p̄hẹ́ nche. Ọ nọdu azu p̄hẹ́ lẹ́ nri; ọle o to jepfujeduru p̄hẹ́. E wuchia p̄hẹ́ l'ime ulo; ẹ̀p̄he nọdu onodu unwanyi, ji p̄hẹ́ anọedu jasuru ẹ̀p̄he nwushihu. ⁴No iya; eze bya bya ezia Amasa sụ iya: "Gude ujiku ẹ̀to kukooru mu ndu Jiuda g'unu l'ẹ̀p̄he tuko wu-pfuta mu l'ẹ́ka-a." ⁵O be teke Amasa jeru gẹ́ ya kukoo ndu Jiuda ọbu; o je anoghata teke eze tu-buru iya. ⁶Dévidi bya asu Abishayi: "Ejo-iphe, Sheba nwa Bikiri e-me anyi bẹ́ kakwa ophu Abusalomu meru. Chita ndu-ozimube nnajiuphu ngu chipyabe iya; odumeka bẹ́ ọo-bahukwa lẹ́ mkpukpu, a kpupheru igbulọ́ mgburugburu; nahu anyi gbalaa." ⁷Ọo ya bụ; Abishayi chitanu ndu ojogu Jiowabu; mę́ ndu Kereti; mę́ ndu Pleteti; mę́ ndu bukpo ndu ike du l'ogu; ẹ̀p̄he shi lẹ́ Jierúsalemú tuḡbua jeshia achị Sheba nwa Bikiri.

⁸O be teke ẹ̀p̄he nokwadu l'oke mkpuma, nọ lẹ́ mkpukpu Gibiyonu; Amasa byapfutashia p̄hẹ́. Teke ono bẹ́ Jiowabu yeru uwe ojogu iya; gude akp̄o, o we l'upfu gude kebuta ogu-echi, a tsuru ọbo. O jeshia ahata ọkpa; ogu-echi ono shi l'obo iya mifu daa. ⁹Jiowabu bya ajia Amasa sụ iya: "Ehu du ngu-a ree; nwanna mu?" Jiowabu bya eworu ẹ́kutara dẹ́ Amasa l'ejia-gba gẹ́ ya tsutsua ya onu. ¹⁰Ophu Amasa te elerwetaduru ẹn̄ya huma ogu-echi, Jiowabu kpapyaberu l'ẹ́ka. Ọo ya bụ; Jiowabu woru iya nmaa ya l'ẹ̀pho; akurepho iya kposhihu l'alị. Ophu ọ nmaeduru iya ogu-echi ono ozo; ọ buwaru iya nu anwuhu.

Ọo ya bụ; Jiowabu yele nwune iya, bu Abishayi chipyabe Sheba nwa Bikiri. ¹¹Onye lanu lẹ́ ndu ojogu Jiowabu je apfuru lẹ́ mgboru Amasa asuje: "Onye suru lẹ́ Jiowabu du iya l'obu; mbu onye suru lẹ́ ya bu kẹ́ Dévidi; g'onye obu tsonuru Jiowabu!" ¹²Noo ya; Amasa dabyiru l'echilabo gbororo l'ẹ́ka ono arwaswi onwiya lẹ́ mee ya. Ọ nọdu abujeru; onye jetaru rwua ẹ́ka ono; l'ọ kpoo beru. Nwoke ono humaeapho l'obujeru; onye jetaru rwua ẹ́ka ono; l'ọ kpoo beru; ọ locha Amasa l'egbudu; chita kpowula-kpowula uwe phukputa iya. ¹³Ọ buru g'a pafueru iya pho l'uzo ono bẹ́ ndu ojogu ono l'ophu tukoru wuru tsoru Jiowabu chiahaa Sheba nwa Bikiri.

¹⁴Sheba ghajakota iphe, bu ipfu, du l'alị ndu Ízùrẹ̀lù je akpaa lẹ́ mkpukpu Abelu-Betu-Maka. Ndu shi l'ipfu Bikiri g'ẹ̀p̄hẹ́ ha kpakodzua wu-tSORU iya. ¹⁵Jiowabu mę́ ndu ojogu iya p̄hẹ́ bya bya ekephee mkpukpu Abelu-Betu-Maka mgburugburu; kebuta Sheba l'ẹ́ka ono. Ẹ̀p̄he bya akube eja

gude kpù-buta mkpùkpù ono; ẹja ono nòdu rwua l'igbulò mkpùkpù ono. Ẹphe nòdu etsukpòshi igbulò mkpùkpù ono; g'òophofukwanu daa. ¹⁶O nweru nwanyì maru mmamiphe, bu lẹ mkpùkpù ono, ara òrà sù: “Unu ngabẹkpodapho-o! Unu ngabẹkpodapho-o! Jiko ziaru mu Jiowabu g'ò bya gẹ mu pfuru yeru iya.” ¹⁷Jiowabu bya ejekubeshia ya; nwanyì ono jia ya sù: “?Bù gùbedua bẹ bẹ Jiowabu?”

O sù iya: “Ee.”

Nwanyì ono sù iya: “Ngabẹkwa nchì l'iphe, mụbe nwozi ngu nwanyì abya epfupfu.”

Jiowabu sù iya: “Mu ngaberu-a nchì.”

¹⁸Nwanyì ono sù: “Teke ndiche bẹ e shi asuje: ‘G'e jekwa akpata ishi lẹ mkpùkpù Abẹlu!’ A -kpatawa ishi ono; eeshi nno doshia opfu, ada nù. ¹⁹Sù-a; anyi bụ ndu dọ àgù; tẹme anyi bụru ndu e gude ire anyi ẹka l'alì Ízùrẹlu. Nta-a bẹ iime g'i mebyishia mkpùkpù, nọ ònodu ne l'alì Ízùrẹlu. ?Denu g'o gude ì nòdu eme g'ì lwua ndu bẹ okiphe Chipfu?”

²⁰Jiowabu sù: “Tùswekwa! Tùswekwa! G'ò tọ bụkwaru mu a-lwu mkpùkpù unu; ọzoo mebyishia ya. ²¹Ọ tọ bụkwa g'ò dọ bẹ ono. Ọle o nwekwanuru nwoke lanu, ẹpha iya bẹ Sheba nwa Bikiri, shi l'alì úbvú úbvú ndu Ifuremu, bẹ onye kwefuru eze, bẹ Dévidi ike. Unu -kpátawa nwoke ono ye mu l'ẹka; mu alufu lẹ mkpùkpù-a.”

Nwanyì ono sù Jiowabu: “Ee-shi l'eli igbulò tufuru ngu ishi nwoke ọbu.” ²²Tọbudu iya bẹ; nwanyì ono gude mmamiphe iya ono jepfu ndu mkpùkpù ono; ẹphe gbuta ishi Sheba nwa Bikiri woru tufuru Jiowabu. O woru opu gbua; ndu ojogu ono wufu lẹ mkpùkpù ono; onyenonu lashì-chaa ibe iya. Jiowabu laphu azọ jepfushia eze lẹ Jierúsalemù.

Ndu-ishi Dévidi

²³Ọo Jiowabu bẹ bẹ onye-ishi iphe, bụkpoo ndu ojogu l'alì ndu Ízùrẹlu. Benaya nwa Jiehoyada bụru onye-ishi ndu Kereti mẹ ndu Pẹleti. ²⁴Adoniramù bụru onye-ishi ọgbo ozi. Jiehoshafatu nwa Ahiludu bụru onye akwakọbeje iphe, meru ememe. ²⁵Sheva bụru onye edeje ẹkwo. Ọ bụru Zadọku yẹe Abyiyata bẹ ndu-uke Chileke. ²⁶Ira kẹ mkpùkpù Jayi bụkwarupho onye uke Chileke kẹ Dévidi.

Ẹgu-ememe waa g'e gude gbushia unwu Sọlu

21 ¹O nweru teke ẹgu mejeru l'alì Ízùrẹlu mkpùrumkpuru apha ẹto lẹ teke Dévidi bẹ eze. Dévidi bya akpaa Chipfu ishi iphe ono. Chipfu sù: “Iphe, kparu iya nù bẹ l'ikpe ọchi tukuru Sọlu yẹe onu-ulo iya l'ishi; kẹle o gbushiru ndu Gibiyonu.” ²Ndu Gibiyonu ono bẹ ta abudu ndu Ízùrẹlu gedegede. Ẹphe bẹ ndu phoduru nù lẹ ndu Amoru. Ndu Ízùrẹlu riburu phẹ nte l'ẹphe e-dobe phẹ ndzụ. Sọlu gudekwanu 'amenya kẹ ndu Ízùrẹlu waa ndu Jiuda bya egbushigbua phẹ. Ọo ya bẹ; eze, bẹ Dévidi bya

akpakọ ndu Gibiyonu pfuru yeru phe. ³Ọ jia phe su: “?Bụ gunu bẹ mu e-meru unu? ?Denu gẹ mu e-me mezita unu; k'ophu unu a-goru onu-oma nu ndu ono, bụ okiphe Chipfu?”

⁴Ndu Gibiyonu ono su iya: “Anyi ta akpadu ishi mkpola-ochaa ozoo mkpola-ododo, shi Sọlu l'eka; ozoo ophu shi l'eka ndibe iya. Ophu o to dupodanu anyi l'eka g'anyi gbua nemadzu l'alì Ízurelu.”

Ọ su phe: “Oo iphe, unu sukpoerupho gẹ mu meeru unu bẹ mu e-meru unu.”

⁵Ọo ya bụ; ephe su eze: “Ọo nwoke ono, bụ iya gbushiru anyi ono; bya achipyaa g'ee-shi g'e gbushigbua anyi; g'anyi ta aphoduhe l'alì Ízurelu l'ophu ono; ⁶bẹ ee-duta unwegirima iya unwoke esaa dufutaru anyi g'anyi je megbushia l'iphu Chipfu lẹ Gibiya, bụ mkpukpu Sọlu, bụ onye ono, Chipfu hotaru ono.”

Ọo ya bụ; eze bya asu phe: “Mu e-duta phe nu unu.”

⁷Obenu leze, bụ Dévidi gude k'ogbandzu yele Jionatanu, bụ nwa Sọlu nọ l'iphu Chipfu gbaa dobe Mefibosheti ndzu. Mefibosheti bụ nwa Jionatanu; bya aburu nwanwa Sọlu. ⁸Ọ buru Amoni waa Mefibosheti, bụ unwoke labo, Rizupa, bụ nwada Aya nwutaru Sọlu bẹ ọ kpuru nu phe. Ọ kpatakwapo unwoke ise, nwada Sọlu, bụ Merabu nwutaru nu phe. Epha ji nwanyị ono bẹ bụ Adurelu nwa Bazilayi, bụ onye shi mkpukpu Mehola. ⁹Dévidi kpuru phe nu ndu Gibiyonu ono; ephe je megbushia phe l'eli úbvú l'iphu Chipfu. Ephe n'esaa ono lakota l'ugbo lanu. Ọ buru mboku mbu lẹ teke aawatajẹ akpata iphe, e meberu l'alì; mbukpoepo lẹ teke aabya awata egbu balì bẹ e gbushiru phe.

¹⁰Noo ya; Rizupa, bụ nwada Aya je achita uwe-aphu phushi l'eli oke mkpuma; zee. Nwanyị ono shi lẹ teke aawatajẹ akpata iphe, e meberu l'alì; nọdu l'eka ono swiru odzu unwu iya ono jeye mini, shi l'igwe dzeru kpua phe. Ophu o to kwejeduru g'ọ duru enu, ephe l'eli, a-bya ebvua odzu phe onu leswe; ozoo anu-egbudu a-byapfuta phe l'enyasi.

¹¹E pfuerupho Dévidi iphe, nwada Aya ono, bụ Rizupa meru; mbu nwanyị ono, Sọlu ta ludu okpobe alulu ono; ¹²ọ tugbua je achita okpu Sọlu yee ke nwa iya, bụ Jionatanu l'eka ndu mkpukpu Jiabeshi-Giladu wushiru iya. Ndu Jiabeshi jeru lẹ mpya je achita iya leze edupfu, nọ lẹ mkpukpu Betu-Shanu l'eka ndu Filisitayinu gburu phe woru kobe l'eli úbvú Gilubowa. ¹³Dévidi tuko okpu Sọlu mẹ ke nwa iya, bụ Jionatanu g'ọ ha chilata e -shi l'eka ono; mekpoo ke ndu ophu e megbushiru emegbushi. ¹⁴E mechaa; ephe woru okpu Sọlu yele ke nwa iya, bụ Jionatanu je elia lẹ mkpukpu Zela, nọ l'alì ndu Benjaminu l'ilu Kishi, bụ nna Sọlu. Ephe tuko iphe, eze karu phe g'ephe mee; mekota. E mechaa; Chileke meeru phe iphe, ephe rworu iya l'opfu ehu alì ono.

Ọgu ozo, ndu Ízurelu waa ndu Filisitayinu nọ lwugbabe
(*1Iphe 20:4-8*)

¹⁵A nonyakwaa ozo; ọgu daru ndu Filisitayinu waa ndu Ízurelu. Dévidi tugbua yee ndu ojogu iya jeshia etso ndu Filisitayinu ogu. A nonyaa; ophu

ike aduedu Dévidi. ¹⁶Ishibibenobu, bụ onye lanụ l'eri Rafa rịa l'owa gę ya gbua Dévidi. Nwoke ono bę ęrwa arwa iya dų shękelu onyirubvu ųkporo iri l'ise. Tęme o turu ogu-echi ọphúú. ¹⁷Ole Abishayi nwa Zeruya bę byaru agbatarų Dévidi; bya echitsua onye Filisitayinu ono; woru iya gbua. Oo ya bų; ndu ojogu Dévidi ribuaru iya angų sų l'ọ tọ byadu etso-baa pęhe je ogu ozo k'ophu a taa tsonyidu oroku ndu ızurelu.

¹⁸Tobudu iya bų; e mecha; ogu ozo daaru ęphe lę ndu Filisitayinu lę mkpukpu Gobu. O bųru teke ono bę Sibekayi, bų onye mkpukpu Husha gburu Safu, bų onye lanų l'eri Rafa.

¹⁹Ogu ozo bya adaarų ęphe lę ndu Filisitayinu lę mkpukpu Gobu. Eluhananu nwa Jiayi, bų onye mkpukpu Betulehemu gbua Lahumi, bų nwune Golayatu, bų onye Gatu; mbų onye ono, igbidigbi arwa, o gude dų gę k'oshi, onye ekweje ękwa egudeje ekwe ękwa.

²⁰Ogu ozo bya adaa lę mkpukpu Gatu. Lęka ono bę o nweru nwoke lanų, haępho kę kpikpirikpii. O fuchaaru mkpushi-ęka ishii ishii lęka iya ęphenebo; waa mkpushi-okpa ishii ishii l'okpa iya ęphenebo. Mkpushi-ęka iya; mę k'okpa iya tukoru dų ųkporo l'ęno. Nwoke ono bukwaphe eri Rafa. ²¹Nwoke ono bya awataępho akọ ndu ızurelu onu; nwa nwune Dévidi, bų Jionatanu nwa Shimeya woru iya gbua.

²²Ndu ono ęphen'ęno shikọta l'eri Rafa, bų onye mkpukpu Gatu. O bųru lęka Dévidi yęle ndu-ozu iya bę ęphe shikọta nwushihu.

Ebvụ ajaja, Dévidi gụru

(Ebvụ 18:1-50)

22 ¹Dévidi gụru ebvụ-a nụ Chipfu lę mbọku, Chipfu nafutakotaru iya lęka ndu ohogu iya l'ophu; kelekele kę Sọlu.

²O gụru sụ:

Oo Chipfu bų agbara-mkpuma nkemu;

bya abųru ųlo-ezeru-ndzų mu; bųru onye agbafutaje mu nų.

³Oo Chileke mu bų agbara-mkpuma, mu agbabaję je edomia onwomu.

Oo ya egbobutaje mu g'ọ tọ dų iphe, e-me mu nų.

O bųru iya bų onye eegudeje okpehu iya dzoo mu.

Oo l'ime iya bę mu agbabaję je anọdu zeeru ndzų.

Tęme o bųru iya bų onye ndzọta mu;

oo yębedua adzoje mu lęka ndu eme mu mkpawere.

⁴Oo Chipfu ono, bų onye gbaru g'a jaję iya ajaja ono bę mu arakuje;

l'ọ dzọta mu lęka ndu ohogu mu.

⁵Anwųhu shiwaa chie mu ęgbirigba l'olu.

Ọla-l'iswi nọdu asọ gborogboro gę mini asọ-pfuta mu.

⁶Ekpa oyi alį-maa nwųa mu kpalaa.

Anwųhu shiwaa woru ọnyà gbaberu mu.

⁷Ole teke mu eje iphe-ęhuka bę mu rakuru Chipfu.

- Mu rakuru Chileke mu.
 Ọ gbẹ l'eze-ulo iya numa olu mu;
 mkpu, mu chiru chiku iya rwua ya nchi.
- 8 Noo ya bu; eliphe l'ophu tehu kparikpari; nmakota jijijiji.
 Eka a turu okpa imigwe l'ophu nmaghukota anmaghu;
 kele Chileke be ehu eghe eghe.
- 9 Enwuru oku, shi iya l'imi akpu ke tutuutuu.
 Oku, shi iya l'onu afushi tukoeppo iphemiphe ekepyashi.
 Icheku-oku iphe, o kepyashiru toko ekameka ata pfupfufu.
- 10 O dojaha akpaminigwe ke tararara; o buru iya alufuta.
 Ochii, gbahuru ke tsukiribaa nodu iya le mkpula okpa.
- 11 O nodu l'eli chierobu phezeta.
 O buru le nkun pherephere be o degeru ezi phuphupu.
- 12 O woru ochii kpuchia onwiya;
 mbu l'urwukpu, mini jiru ejiji be no-pheru iya mgburugburu.
- 13 Icheku-oku, ata pfupfufu
 shi l'ogbunwiiinwii ya agushihugba.
- 14 No iya; Chipfu gbẹ l'akpaminigwe tua egbigwe.
 A numa olu onye ono, bu Okalibe-kakota-shii ono.
- 15 O gbaa apfu gude chikaa ndu ohogu iya.
 Ebemu-igwe be o kuru ke phoo;
 ephe zekota l'oso gbalachaa.
- 16 Chipfu ziru unme fuu gbooru ndu ohogu iya uja.
 Eze Enyimu sokahu ebo; k'ophu a humachaaaru ohu-enyimu lenya;
 kpuhachaa eka a turu okpa-ali mgboko; a huma.
- 17 Chipfu gbẹ l'imigwe tufu eka;
 zu mu gburumu; gufuta mu l'ogbu-mini.
- 18 O nafutakwaru mu pho l'eka ndu ohogu mu, okpehu du;
 me l'eka iphe, bukpo ndu mu du ash;e;
 noo kele ephe kariru mu eka.
- 19 Mboku ono, mu eje iphe-ehuka ono be ephe tsoru mu ogu;
 obenu l'oo Chipfu gbataru mu ike.
- 20 Oo yebedua kutaru mu dobe l'eka mu no tusaru ehu.
 O yeru mu eka nafuta mu l'ogu; kele mu du iya l'obu.
- 21 Chipfu buru mu nggo; kele mu bu onye pfuberekoto;
 mbu kele mu bu onye iswi du mma.
- 22 Noo kele o buepho uzo, Chipfu toru be mu anoduje etso.
 Ophu mu egudejedu eme ejo-iphe gbakuta Chileke azu.
- 23 Ekemu Chipfu be mu nwubekotaru enya g'o ha.
 Temu ophu mu aghajeduru iphe, o suru g'e meje okotazu.
- 24 O to dukpodaa eka uta du mu l'ehu l'atatiphu iya.
 Mu sedekpoerupho onwomu; ophu o dudu ejo-iphe, mu yejeru eka.

- 25 Chipfu buru mu nggo; keḷe mu bu onye p̄f̄uberekoto;
mbu l'o buru mu nggo; keḷe mu bu onye iswi du mma l'ip̄hu iya.
- 26 Ndu yeru ngu obu be iigoshije l'i yeru obu.
Ndu duebe ree be īduebejeru ree.
- 27 Ndu obu phe guru ip̄hóró be iidobejeru obu ip̄hóró.
I n̄odu emejeru ndu doberu ̄zo phe nḡogodogo nḡogodogo g'umere
phe gbaru.
- 28 Ndu wozeru onwophe al̄i be īidzotaje;
obenu l'̄nya ngu aduje l'̄ka ndu eku onwophe n̄o g'i wozeta phe
al̄i.
- 29 Oo ḡubedua, bu Chipfu bu or̄oku mu.
Oo ḡube Chipfu emeje g'ip̄hóró duru mu l'̄ka ōchii agba.
- 30 Eshinu iyeru mu eka be mu e-tso ikpoto ndu oj̄ogu ōgu.
Igbulo mkp̄ukpu phe be mu e-nyi; eshinu mu le Chileke swi.
- 31 ̄zo Chileke be nt̄ucha ad̄udu m'ilile;
opfu Chipfu bukota okpobe opfu.
Oogbobutaje ndu gbabar̄u l'ime iya je an̄odu ezeru ndzu.
- 32 ?Bu onye bubaa Okalibe, du nu, ab̄udu Chipfu kpoloko?
?Bu onye buba agbara-mkpuma, ab̄udu Chileke anyi?
- 33 Oo Chileke emeje g'ike du mu.
O buru iya meru ̄zo mu; ōphu nt̄ucha ad̄udu iya.
- 34 Oomeje ge mu p̄fu shooshoo ge mgbada;
mbu l'oomeje ge mu p̄furu p̄fushia ike l'eli úbvú.
- 35 O ziru mu; mu maru g'aalwuje ōgu;
k'ophu bu l'o to dudu m'obeta o buru ap̄fu, e kweru l'igwe; mu
ad̄uele-a ike gbaa ya.
- 36 Oo ḡube Chipfu egbobutaje mu; shi egube ono dzoo mu ndzu.
Eka iyeru mu ekutseje mu.
- 37 I mesataru ̄zo mu ōsa; g'okpa te echiswafu mu.
- 38 Mu gude ōso chia ndu ōhogu mu; gwee phe arakabya;
ōphu mu anmaduru nggu; jas̄u mu mee phe; epe buru
mkpurupyata.
- 39 Mu chiru phe pyakapyaka; k'ophu epe ta ad̄uedu ike gbelibaa ishi
ozo.
Epe zegbaep̄ho ke manyoo le mgboru okpa mu.
- 40 Oo ike nkengu be mu gude eje ōgu.
Ndu etso mu opfu be i meru; epe gbushiru mu ikpere.
- 41 Ndu ōhogu mu be i meru; epe chie okpa l'oso.
I mee; mu t̄uko ndu mu du ash̄i gbushikota.
- 42 Epe chia mkpu; ōphu o dudu onye gbaru phe mkpu.
Epe raku Chipfu; ōphu o yeduru phe onu.
- 43 Mu gweru phe uji mee phe; epe du g'urwuku, du l'al̄i.

- Mu tsua phẹ ọtsuepfu; zọọ phẹ ọtilitoli g'ẹpuchi, nọ lẹ gbororo.
- 44 I nafutaru mu l'ẹka ndu etso mu opfu;
bya emee mu; mu bọru ishi ọhamoha;
k'ọphu ndu mu eshidu maru byaru alwakọta mu l'ẹka.
- 45 Ndu ọhozo ephozekọtaru mu.
Ephẹ -nụma l'owa-a iphe, mu sọru g'e mee baa; ephẹ emee ya
egwegwa.
- 46 Meji ọtufukota iphe, bu ndu ọhozo ono;
teme ephẹ nọdu eshijegbaa l'ẹka ephẹ shi wohaa onwophe phuru
yeyeye byapfuta mu.
- 47 Chipfu nọkwa ndzụ; unu tua agbara-mkpuma nkemu ono epha!
Unu kutsee Chileke; l'ọo ya bu onye adzọje mu nù!
- 48 Ọo Chileke ejeje agwata ụgwo iphe, ndu ọhogu mu meru mu.
O meru; unwu-eliphe nọdu mu lẹ mkpula.
- 49 Ọonafutaje mu l'ẹka ndu ọhogu mu;
oowolije mu eli woru mu doghaa ndu etso mu opfu.
Ọogbafutaje mu l'ẹka ndu emeje nemadzụ iphe-kpangangaa.
- 50 Noo g'o gude mu je a-pfuru l'iphu ọhamoha kele gube Chipfu ekele.
Mu a-gụ ebvu gude tua ngu epha.
- 51 Onye eze, ọ họtaru bẹ oomeje g'o mekpee l'ọgu.
N-yemobu iya bẹ ọonoduje egoshi onye ọ wuru manụ l'ishi,
bu Dévidi yẹ oshilọkpa iya jasụ lẹ tuutuutuu lẹ mịimiimii.

Opfu ikpazụ, Dévidi pfuru

- 23** ¹ Ọwaa bu opfu ikpazụ Dévidi:
“Ọwaa bu iphe, Dévidi; nwa Jiesi pfuru;
mbụ opfu nwoke ono, Chileke woliru eli;
mbụ nwoke ono, Chileke kẹ Jiékpọ wuru manụ l'ishi g'ọ bọru eze
ono;
mbụ onye ono, agụjeru ndu Ízurelụ ebvu, atso uto ono.
- 2 Unme Chipfu bẹ shi l'ọnu mu epfu opfu.
Opfu iya degeru mu edegeru l'ire.
- 3 Chileke kẹ Ízurelụ bẹ pfuwaru opfu.
Oke mkpuma kẹ ndu Ízurelụ bẹ sọru mu lẹ-a:
‘Teke eze eme iphe, pfuru ọto;
mbụ teke oome atsụ Chileke ebvu
- 4 bẹ ọduje g'ìphóró nchi-abọhu lẹ teke ẹnyanwu awa awawa;
mbụ lẹ mbọku igwe dọ kọrokoro.
Ọduje g'anwụ, emeje g'ẹswa, akpọ-futa akpọ-futa l'alị sha kẹ
biribiri
mẹ mini dzegheepho.’
- 5 Ọo ẹgube ono bẹ ndibe mu ephẹ lẹ Chileke dọ lẹ ree.

Noo kele o meru; mu l'iya gbaa ndzù, a-nò jasù l'ojejoje.

O meru iya ọ nguru anguru l'iphemiphe;

bya emee ya g'ọ tọ dọ iphe, e-mebyi iya nù.

Chileke e-me gẹ ndzọta mu dzua oke;

tẹme iphemiphe, agù mu nù bẹ oo-meru mu.

6 Obenu lẹ ndu bụ ọgalemkpa bẹ ee-tuphachaa etupha g'onye tupharu obvu;

kele e te egudejedu ẹka achita phe.

7 Onye edenyi ẹka l'obvu ono gundefutaje iphe-ígwè ọzoo oshi arwa; ọ buru ọku bẹ aakpokotaje iya l'ẹka ọ wushiru.”

Ndu a maru amaru lẹ ndu ojogu Dévidi

(1Iphe 11:10-19)

8 Waa ẹpha ndu ojogu, ike kakọta lẹ ndu ojogu Dévidi baa: Ishubelu onye Hakumonu. Ọo ya shi buru onye-ishi umadzu ẹto, kachakpoo mkparawa. O gudeje arwa jepfu unu umadzu labo ogu; gbushikota phe l'ugbo lanu.

9 Onye ophu etsota iya nù bụ Eleyaza nwa Dodo; onye shi l'eri Ahowa. Yẹbedua yikwapho l'umadzu ẹto ono, kachakpoo mkparawa ono. O tso Dévidi pfubyishia ndu Filisitayinu lẹ teke ẹphe dzukoberu k'ogu lẹ Pasu-Damimu. Ndu Ízurelu tsulaaharu azu; 10 yẹbedua pfushiepho ike gbua ndu Filisitayinu jasuru ẹka tsushihu iya mee; mbu ẹka kwekobechaa ya ekwekobe nyakuru l'ogu-echi, ọ pa. Chipfu mee; ọ lwu-kpee k'ophu paru ẹka apaa lẹ mboku ono. E mechaa; ndu ophu wu-phu azu. Ọ buwaru iphe, ẹphe wu-phudoru azu bụ g'ẹphe gwee ivu ndu e gbushiru egbushi.

11 Onye k'eto, etsota iya nù bẹ bu Shama nwa Agee; onye Hararu. Ujiku lanu bẹ ndu Filisitayinu kpafo-dzujeru onwophe k'ogu lẹ Lehi; mbu l'egu, azamu jiru ejiji ono. Ndu ojogu ndu Ízurelu yekota okpa l'oso gbalachaa.

12 Obenu lẹ Shama pfushierupho ike l'echilabo egu ono; tsoo ndu Filisitayinu ogu; gbushia phe. Chipfu mee; ọ lwu-kpee k'ophu paru ẹka apaa.

13 O be lẹ teke akpata iphe l'alj; umadzu ẹto l'ime ukporo umadzu l'umadzu iri, bugbaa ndu-ishi ogu wuru jepfu Dévidi l'ogba Adulamu. Teke ono bẹ ikpoto ndu Filisitayinu wufutaru bya adoru lẹ nsuda Refayimu. 14 Teke ono bẹ Dévidi no l'ime ẹka ọ kpuru; o shihu ike. Ndu ojogu ndu Filisitayinu doru lẹ mkpukpu Betulehemu. 15 Egu-mini wata agushi Dévidi ike; ọ su: “Oowa-e; ọ dọ mu g'a su l'o nweru onye gbẹ je ekutaru mu mini lẹ welu, no-kube ẹka eeshije abahu lẹ Betulehemu gẹ mu ngua!”

16 Ọo ya bu; unwoke ẹto ono, kachakpoo mkparawa ono kpata ọzo ghatta ndu ojogu ndu Filisitayinu l'ẹka ẹphe doru ono; je ekuta mini lẹ welu ono, no-kube l'ẹka ono, eeshije abahu lẹ Betulehemu ono; wotaru Dévidi. Ọle Dévidi te ekwedu ngua mini ono; o woru iya wushiaru Chipfu; 17 bya asu: “Tuswekwa! Jiko Chipfu; te ekwekwa gẹ mu mee egube iphe ọwa-a.

?Mini-a ta aduáda údudu gè mee ndu-a, woru ndzù phè tsebe l'ònu èta g'ee-shi g'e kuta iya-a tò?" Oo ya bú; òphu ò ngùduru mini ono. Nochaa eze iphe, unwoke èto ono, kachakpòò mkparawa ono megbabèru bú ono.

¹⁸Abishayi, bú nwune Jiowabu nwa Zeruya bú onye-ishi ùmadzu èto ono. Abishayi bè gudeje arwa iya jefpu ùmadzu ùkporo iri l'ise ògu; gbushikòta phè; e shiwarò nno; a maru èpha iya gè k'ùmadzu èto ono. ¹⁹Oo yèbedua bè a kachaa akwabè ùbvù l'ime ùmadzu èto ono. O búru yèbedua bú onye-ishi phè; òle a ta gùkwanuru iya ye l'ùmadzu èto ono.

²⁰Benaya nwa Jiehojada bú onye òkpehu dù shii. Èka o shi bú Kabùzèlu. Yèbedua mekwarùpho eze iphe, parù èka apaa. Oo yèbedua gburu unwoke Mówabu labò ono, òkpehu dù-be g'oduma ono. O búkwaru iya phò jejeru egbua oduma l'ime nsù lè mbòku, akamini, kpùkoru akpùko dashìru. ²¹Benaya gbujekwarùpho oke mkparawa onye Ijiputu, pa arwa. Iphe, yèbedua gude bapfu iya bú mgbòro; bya anata nwoke Ijiputu ono arwa, o gude l'èka; gude nmagbua ya. ²²Noo gè Benaya nwa Jiehojada meberu ike bú ono. E shiwarò nno; a maru èpha iya gè k'ùmadzu èto phò, kachakpòò mkparawa phò. ²³O bú onye a kwatakpòò akwabè ùbvù l'ime ùkporo ùmadzu l'ùmadzu iri phò. Òle a ta gùkobeduru iya l'ime ùmadzu èto phò. Dévidi meru iya onye-ishi lè ndu ojàgu, eche iya nche.

²⁴Asahèlu, bú nwune Jiowabu yì l'ime ùkporo ùmadzu l'ùmadzu iri ono. Ndu òzo bú Èluhananu nwa Dodo kè Bètulehemu; ²⁵waa Shama kè Haròdu; waa Elika kè Haròdu; ²⁶waa Hèlezú kè Pèleti; waa Ira nwa Ikeshi kè Tekowa; ²⁷waa Abiyeza kè Anatótu; waa Mebunayi kè Husha; ²⁸waa Zalùmonu, bú onye shi l'eri Ahowa; waa Maharayi kè Netofa; ²⁹waa Helèbu nwa Bana kè Netofa; waa Itayi nwa Ribayi kè Gibiya, dù l'alì ndu Benjiaminu; ³⁰waa Benaya kè Piratònu; waa Hìdayi, shi l'ùzo nggele Gashi; ³¹waa Abiyalùbonu kè nsùda Jiòdanu; waa Azùmavetu kè Bahurimu; ³²waa Èliyahuba kè Shalùbonu; waa ùnwu Jiashènu; waa Jionatanu; ³³waa Shama kè Hararu; waa Ahayamu nwa Shararu kè Hararu; ³⁴waa Elifeletu nwa Ahasùbaya kè Maka; waa Eliyamu nwa Ahitofèlu kè Gilo; ³⁵waa Hezuro kè Kamèlu; waa Parayi kè Arabu; ³⁶waa Igalu; nwa Nétanu kè Zoba; waa Bani; onye ipfu Gadu; ³⁷waa Zelekú, bú onye Amònu; waa Naharayi kè Berotu, bú onye achijeru Jiowabu nwa Zeruya ngwògu; ³⁸waa Ira kè Itiru; waa Garèbu kè Itiru kwaphò; ³⁹mèfua Uráya, bú onye Hetu. Ephe tùkoru dù ùkporo ùmadzu l'ùmadzu iri l'èsa.

Dévidi agù ndu Ízurelu ògu

(1Iphe 21:1-6)

24 ¹Tòbudu iya bú; Chipfu voru òku wà èhu l'opfu èhu ndu Ízurelu. O kpalia Dévidi g'o mee g'iphe-èhuka dapfuta phè; bya asù iya: “Tùgbua je agù ndu Ízurelu waa ndu Jiuda ògu.” ²Oo ya bú; eze, bú Dévidi zia Jiowabu; mè ndu-ishi ndu ojàgu, èphe l'iya nò sù: “Unu

jegbabekota ipfu, dukota le Ízurelu; e -shi le mkpukpu Danu je akpaa le mkpukpu Biye-Sheba gukota phe ugu k'ophu mu a-maru g'ephe ha.”

³Jiowabu su: “Ge Chipfu, bu Chileke ngu mekwaa ge ndu ono kabaa igwerigwe ugbo ukporo ise eme le g'ephe ha nta-a; teme ge gube nnajuphu mu, bu eze gudekwapho enya ngu huma iya. Ole ?bukwanu ke gunu meru g'o gude gube nnajuphu mu, bu eze nodu eme g'i mee egube iphe ono?” ⁴E mecha; opfu eze dagbunaa ke Jiowabu; ye le ke ndu-ishi ndu ojogu iya ono. Oo ya bu; Jiowabu waa ndu-ishi ndu ojogu ono shi l'iphu eze tugbua jeshia agu ndu Ízurelu ugu ono. ⁵Ephe bya adaepho enyimu Jiordanu; ephe doshia le mgboru mkpukpu Arowa; mbu l'uzo ndohali mkpukpu, no lechilabo nsuda; bya agbe leka ono jeshia l'ali ndu Gadu jerwuchaa mkpukpu Jiaza. ⁶Ephe bya abahu l'ali Giladu; me mkpukpu Tatimu-Hodushi. Ephe gbé leka ono bahu le mkpukpu Danu-Jianu; bya agbajia lufu jeshia mkpukpu Sayidonu. ⁷Ephe bya eshi nno chebwaro mkpukpu ndu Taya, a kpushiru ike; jekota mkpukpu, dukota l'ali ndu Hevu ye le ndu Kenuanu. Ephe mecha kpo-chia ya ishi le mkpukpu Biye-Sheba, no lechiegu ndohali l'ali ndu Jiuda. ⁸Ephe jeru iya onwa tete l'ujiku ukporo teme ephe lwaphuta azu le Jierusalemu. ⁹Jiowabu bya akporu eze, bu Dévidi ge ndu ono, o guru ugu ono hakotakpoo. Ndu Ízurelu du ukporo unu unwoke ugbo ukporo ise,^f bu ndu ike du l'ogu; bya aburu ndu aduje ike paa ugu-echi. Ndu Jiuda du ukporo unu unwoke ugbo ukporo eto l'unu unwoke ugbo ukporo labo l'iri.^g

¹⁰Dévidi guchaepho ndu ono ugu ono; meji tsukaha iya. Oo ya bu; o su Chipfu: “Mu meakwaru iphe-eji, paru eka le k'iphe-a, mu meru-a. Ole-a; jiko Chipfu; wofunu ejo-iphe ono, mube onye-ozu ngu meru ono; kele oo eswe be mu meru ono.”

¹¹Dévidi bya etehushia le nchitabohu iya; Chipfu pfuwaru Gadu, bu onye mpfuchiru Chileke; mbu onye aphujeru Dévidi ophulanya su iya: ¹²“Je asu Dévidi le Chipfu suru-a: Uzi iphe eto be mu doberu ngu; gi hata nanu, mu e-me ngu.”

¹³Oo ya bu; Gadu jepfu Dévidi je asu iya: “?Bu g'ejo okpa-nri bya pfuta ngu noo apha eto l'ali-a? To? bu gi gbaa oso onwa eto leka ndu ohogu ngu achi ngu? To? bu g'ejo iphe-ememe bya emee noo ujiku eto l'ali ngu? Nta-a bukwa gi rja ya ariri karu mu; ge mu maru iphe, mu e-je epfuaru onye ono, ziru mu nu ono.”

¹⁴Dévidi bya asu Gadu: “Mu noakwa l'oke iphe-ehuka. Ole o kakwa ree g'anyi daba leka Chipfu; eme l'anyi dabaru nemadzu leka; noo kele obu-imemini Chipfu paru eka apaa.”

¹⁵Oo ya bu; Chipfu loru ejo iphe-ememe tu ndu Ízurelu shita l'utsu mboku ono jeye mboku, o tu-buru phe. E -shi le Danu jasu le Biye-Sheba

^f 24:9 Bu iya bu 800,000, le mbekee. ^g 24:9 Bu iya bu 500,000, le mbekee.

bẹ ẹphe dù ụkporo ụnu nemadzụ ugbo ẹsato l'unu iri l'ise nwụshihu.

¹⁶Ojosi-imigwe ono machiẹpho ẹka gẹ ya mebyishia mkpukpu Jierúsalemu; o rwua Chipfu l'ẹhu; mbụ ẹjo-iphe ono, dapfuru phẹ nụ ono. O pfuuru ojosi-imigwe ono, egbushi ndu ono sụ iya: “Ọ dụwaa ree! Sephu ẹka ngu azụ parụ phẹ haal!” Teke ono bẹ ojosi Chipfu ono nọwaa l'oma ẹka Arawuna, bụ onye Jiebusu anọduje echishi ẹswa lẹ balị iya.

¹⁷Dévidi hụmaepho g'ojosi-imigwe ono gude echitsushi ndu ono; ọ sụ Chipfu: “Oowa-e; ọ kwa mbẹdua meru iphe-ẹji; mbụ l'ọo mbẹdua bẹ meru iphe, adudu ree. ?Ụnwu aturu-a mehunuru ole? G'ọ bụ-chiaru mbẹdua waa ndibe nna mu bẹ ịi-da ẹjo ẹka l'ẹhu!”

¹⁸Ọ bụru mbọku ono bẹ Gadu byaru abyapfuta Dévidi bya asụ iya: “Tugbua je akpuru Chipfu ọru-ngweja l'oma ẹka ono, Arawuna, bụ onye Jiebusu anọduje echishi ẹswa lẹ balị ono.” ¹⁹Ọo ya bụ; Dévidi tugbua jeshia eme ẹgube ono, Chipfu shi l'onu Gadu zia ya ono. ²⁰Arawuna tufuepho ẹnya hụma eze, bụ Dévidi yẹle ndu-ozii iya g'ẹphe eje abyapfuta iya; o je je adaa kpurumu l'ataphu eze phozeta kwabẹ iya ụbvù. ²¹Arawuna sụ: “?Bukwa ole bẹ nnajiuphu mu, bụ eze byapfutasharu onye-ozii iya?”

Dévidi sụ iya: “Mu byaru gẹ mu zua ngu ẹka iichishije balị gẹ mu kpuru Chipfu ọru-ngweja; k'ophu ẹjo iphe-ememe-a, emenua e-buhu.”

²²Arawuna sụ Dévidi: “Gẹ gube nnajiuphu mu, bụ eze wotakpopho iphe, dù ngu ree gude gwee ngweja ọbu. Waa eswi, ee-gude gwee ngweja-akpo-ọku nụ Chipfu; waa iphe, eegudeje echishi ẹswa l'ereshi; me odogoro, eegudeje tugbabe eswi g'ọ bụru nkụ. ²³Gube eze; iphemiphe ono g'ọ ha bụ mube Arawuna nuru ngu iya.” Arawuna bya asukwa iya pho: “Gẹ Chipfu, bụ Chileke ngu natakwaro ngweja ngu.”

²⁴Eze, bụ Dévidi sụ Arawuna: “Waawakwa; mu a-pfu ngu ugwo iya. Mu te egudedu iphe, adudu iphe, o phuru mu egweru Chipfu, bụ Chileke mu ngweja-akpo-ọku.” Ọo ya bụ; Dévidi zua oma ẹka aanọduje echishi ẹswa lẹ balị ono azuzu; me eswi ono. Ọ bụru mkpola-ochaa, ẹrwa iya dù ụkporo shekelu labo lẹ shekelu iri bẹ o gude zua ya. ²⁵Dévidi bya akpuru Chipfu ọru-ngweja l'eka ono; bya egwee ngweja-akpo-ọku; me ngweja-ẹhu-guu l'eli iya. Chipfu numa arworwo, ọ rworu iya l'opfu ẹhu alị Ízurelu ono; ẹjo iphe-ememe ono, eme nụ ono mebuhu.